

FEAR-TATHAICH NAM BEANN.

AN CEUD MHIOS, 1850.



“Gràdhaichidh tu an Tighearna do Dhia 'lè d' uile chridhe, agus do choimhearsnach mar thu féin,”


a.
gu'n a
gu'm biodu
nis air a turas do

O'n cheud là anns a **AND BY PATON & RITCHIE,**

fhaic i 'leithid

òl 'us ce 3 HANOVER STREET, EDINBURGH.

MDCCCL.



' Gràdhaidh tu an Tighearna do Dhia, le d' uile chridhe, agus do
choimhearsnach mar thu fein."

FEAR-TATHAICH NAM BEANN.

AIR. XXIV.] AN CEUD MHIOS, 1850.

[R'A REIC AIR SON
TRI SGILLINN

CONTENTS :—I. The departure of the Old Year, page 727. II. On the eternal condition of those dying in Infancy, page 731. III. "Hitherto hath the Lord helped us," or a Tale of Highland Destitution, page 736. IV. A Letter to the Editor on the Education of Children, page 741. V. The Arctic Expedition, page 746. VI. Emigration to Port Natal, page 750. VII. Gaelic Proverbs, (continued), page 752. VIII. Public News ;—Austria and Hungary—the Settlers at Cape Town and the Convicts—Death of the Queen Dowager—Markets, &c., pages, 754—58.

I.

TRIALL NA SEANA BHLIADHNA O'N T-SAOGHAL.

AIR oidhche àraidh an uair a bha an t-seana bhliadhna a' tighin gu crìch thug i fainear le mòr bhròn gu'n robh gach sean agus òg, gach lag agus làidir, a' feitheamh mì-fhoighidneach na h-uaire anns an tilgeadh i an deò. Shaoil an t-seana mhàthair bho chd gu'n d' rinn i a dleas' nas ris gach aon; agus bha i ann am beachd gu'm biodh muinntir na dùthcha fo mhulad a chionn gu'n robh i nis air a turas do thìr na dì-chuimhn'. Ach bha i air a mealladh. O'n cheud là anns an d' thainig i dh' ionnsuidh an t-saoghail cha'n fhac i 'leithid a dh' àbhachdas agus a dh' fhearas-chuideachd—bha òl 'us ceòl 'us danns' ann—gach duine ri gairdeachas a chionn gu'n robh i ga'm fàgail. An uair a thug i so fainear chuir e trioblaid mhòr oirre—thionndaidh i 'culthaobh ris gach neach a bha mu'n cuairt d'i, agus labhair i gu fann anns na briathran a leanas.—

“B' fhearr leam nach tainig mi riamh a dh'ionnsuidh an t-saoghail—a' faicinn agus a' cluinntinn, air leaba mo bhàis, na muinntir sin air an do chuir mi co liutha comain, ri urrad ghàird-eachais air son mì bhi ga'm fàgail. Bu mhiodalach, briathrach iad an uair a thainig mi 'nam measg air tùs—gach aon 's an tìr ga'm fhàilteachadh le furan. Is beag a shaoil mi gu'm fàgainn an an saoghal ag éisdeachd ri mire, 's ri sùgradh, agus ri rannan de dh'òrain diomhain. Cha 'n 'eil de shòlas agam air an oidhche nochd, air leaba mo bhàis, ach co fada 's is fiosrach mi gu'n do rinn mi mo dhleas 'nas ris gach neach mar a b' fhearr a dh'fheud mi. Cha tug mi gealladh sam bith seachad nach do choimh-gheall mi: agus tha mi a' smaoineachadh gu'n robh mi co toirbheartach, agus co bàigheil 's a bha iadsan a thainig romham.

“Rinn mo dhà dhuine dhéug chloinne nach maireann na bha 'nan comas air son maith na dùthcha. Gun teagamh sam bith bha mo cheud-ghin (*January*) car beag fionnuar 'na nàdur; ach ged a bha, is iomad oidhche chridheil a chuir iad seachad 'na chuideachd.

“Ged a bha 'm Màrt tioram, greannach, bu mhaith gu feum e. Thug e gach cothrom dhoibh gu deasachadh air son na bha rompa; agus iadsan a rinn dimeas air, agus nach do ghabh an cothrom 'na àm bha aithreachas ni bu leòir orra an uair a bha e tuille is anamoch.

“'Na dhéigh-san rugadh a chaileag àluinn sin, Màigh. Is iomad déur a shil i an déigh a bràthar. Cha robh latha d'a beatha nach d' uisgich i am fearann 's am fonn a chaidh ullachadh an uair a bha esan beò. Chuir i dath uaine air gach slios agus raon: 's cha robh i latha riamh gun fhiamh ghàire, ged bu tric an t-snithe air a gruaidhean.

“'Na déigh-se thainig a piuthar (*June*) a bha ro mhaiseach, baoisgeil, le crùn de fhilùraichean air a ceann. B' ioma òganau-ach tapaidh a dh' iarr a làmh, agus leis am bu mhianu suidhe leatha air chùl gaoithe 's air eudan gréine.

“Bha a piuthar a b' òige (*July*) car coltach rithe 'na cruth 's na nàdur. Bha a h-anail co cùbhraidh ri gaoth a' ghàraidh. Bu tric a shuidh gach beag 'us mòr, sean 'us òg maille rithe fo dhubhar nan craobh. Bu mhinic a choisich iad leatha 'n uair a bha an drùchd air an fhéur. B' àluinn i 'am béul an anamoich, an uair a bhiodh a h-obair latha seachad, 's a bhiodh an spréidh a' tighin 'hun na buaile. Bha gach aon diubh a' toirt bàrr air a chéile ann an àilleachd; ged a bha iad uile, mo chreach! co diombuan.

“Ach saoil an do dhì-chuimhnich iad esan (*am Foghar*) a thainig luchdaichte leis gach seòrsa meas, agus lòn. Is ioma teaghlach a rinn e ait, agus sabhal a rinn e 'lionadh. Ach ciod a bhuil a rinn mòran a tha an nochd ri urrad aigheir de gach cothrom a fhuair iad air son an cor féin a chur 'am feobhas?

“Chuir mi an eachdamb cuid de m' ùine air leth air son fois, sàmhchair, agus fòghlum féumail a thoirt dhoibh.” Air dh'i so a ràdh thainig reachd 'na muineal—shil a deòir gu dlùth air a

gruaidhean preasach. Co luath 's a fhuair i faochadh, thubhairt i:—"O! mo Shàbaidean Naomha—na gibhtean a bu luachmhoire a bha agam, agus a bu luachmhoire a chaidh a bhuileachadh air clann nan daoine! Ach gidheadh tha mòran tuille de bhròn no de chorruich orm air son nan ciontach truagh ud a tha ri urrad othail mu'm leabaidh bhàis. Rinn iad tuille croin dhoibh féin na rinn iad domhsa. Tha mòran de na h-amadain ud a thug gach oidhirp a bha 'nan comas air mo mhaoin a mhealladh uam; ach mo thruaighe! ghlacadh iad féin anns an lion a leag iad air son mise 'ribeadh. Cha robh de lethsgéul aca ach nach b'urrainn iad nì sam bith a dheanamh a chionn gu'n robh iad air an ceangal le LEISG. Shuidheadh iad so fad an là earraich dh'fheuch am faigheadh iad fàth air beagan de m' mhaoin a mhealladh uam.

"Thug cuid eile oidheirp air mo spùinneadh, agus eadhoin air mo mharbhadh. Gha robh de lethsgéul aca so ach gu'n robh iad 'n an CODAL. Cha 'n 'e mhàin gu'n robh iad gun mhaith, gun stà fad fuachd a' gheamhraidh, ach a' chearta co beag maith anns a' mhaduinn shamhraidh: agus tha 'bhlàth, 'sa bhuil air cuid diubbh an diugh.

"Thug mòran oidhirp air mo chràdh le RÌOMHADH agus le SPÒRS. Bha iad so ro fheallta; oir bha iad a' gabhail orra gu'n robh mòr spéis aca dhiom, an uair a bha iad 'n an tur naimhdean domh. Bha mòran diubbh glan a mach ach salach a stigh. Thug na h-urrad mòran de m' stòras air falbh le ana-caitheadh, agus le sògh; ach phàigh iad daor gu leòir air a shon.

"Bha cuid eile thug oidhirp ghràineil air mo bhàthadh; ach mo thruaighe! thug iad iad féin gu trioblaid agus gu cràdh anns an oidhirp. Is ioma aon de na crèutairan truagh ud a chunnaic mi nì b' ilse na ainmhidhean na mach'rach, agus nì b' oillteile na uile-bheisdean a' chuain. An céill 's an toinnisg air an tréigsinn—cainnt shalach agus mionnan an aon uirigleadh a bha aca. Agus cluinn iad air an oidhch' an nochd—ri òl 's ri aighear—a' cruinneachadh a dh'fhàilteachadh na bana-choigrich a tha 'tighin 'am àite-sa 'an ùine ghoirid. Is beag fios a th'aice cò a caraid. An ceann beagan làithean chì i nach iadsan is àirde glaoth, agus is motha othail is dilse dh'i. Tha e uile choltach gu'm bi aithreachas air gu leòir dhiubbh, an uair a bhios mis' an tìr na dì-chuimhn', air son mar a ghnàthaich iad mi. Chomharlichinn dhoibh gun an ùine 'chaitheamh a' sodal rithise a tha 'tighin 'am dhéigh: oir co cinnteach 's a tha mis' an nochd air mo leabaidh-bhàis, bheir esan a thug dhomh mo bhith gu cunntas iad air son mar a bhuin iad rium. Tha mi 'n dòchas gu'n gnàthaich iad ise a tha 'tigbin 'am àite nas fearr na ghnàthaich iad mise. Tha fios agam gu'n toir iad iomadh gealladh dh'ise co maith 's a thug iad dhomhsa 'an làithean m' òige: ach cumadh iad air chuimhne, gur 'fearr aon oidhirp le dìchioll, na dusan gealladh gun choimh-ghealladh.' "

Air dh'i so a ràdh dh'fhàs i ro làg—dh'fhàilnich a fradbare—thainig gleadhran a' bhàis na muineal. Thug i oidhirp air labh-

airt, ach bha a guth ro fhann, agus cha tuigeadh aon fhocal a thubhairt i le gleadhraich na muinntir sin a bha ri othail, agus ri iolach a chionn gu a robh i ga'm fàgail. Bhual an t-uaireadar mòr le 'chlag fuaimneach dà uair dhéug co luath 's a bha 'na chomas, dh'fheuch an tionndadh iad an aire ri'm bana-charaid dhileas a bha 'nis a' toirt suas an deò; ach cha bu mhòr dhiubh a ghabh suim air bith dh'i aig a crìch!

Cha bu luaithe a thilg an t-seana Bhliadhna an deò na thainig a' Bhliadhn' ùr na h-àite. Bha ise sunndach, aighearach; agus cha b' ioghnadh ged a bha: oir bu mhòr an fhaoilte 'rinneadh rithe. Cha robh crubach no bacach 's an dùthaich nach d'éirich air a chorraspaid co luath 's a thainig i dlùth. Cha robh tigh anns nach robh botal a' feitheamh oirre, agus cha robh botal aig nach robh *glug*, *glug* ag òl air a slàinte. Bha sean 'us òg, bochd 'us beairt-each, uil' a' guidhe "Bliadhna mhaith Ur" do aon a chéile.

Bha so uile glé ghealtannach; ach bha mòran diubhsan a bu chridheile furan 's a' mhaduinn air bheag suim de'n "Bhliadhna mhaith Uir" aig tighin an anamoich. Bha iad gun chùram, gun suim, gun tùr, gun mhothachadh, gun chomas gluasaid cois no làimhe leis a' mhisc. Chunnaic sinn a' "Bhliadhn' Ur" a' toirt sùl' amharusaich, iomagainuich orra; agus chuala sinn i ag ràdh ann an guth iosal, "Tha eagal orm nach dean iad sud *maith* dhoibh féin no dhomhsa. Tha do shaoil mi 's a' mhaduinn gu'm biodh iad co luath 'n an aobhar nàire."

Dh'fhàg sinn ann am marbh-shuain throm na druaid iad. Cha'n fhaca sinn uaith sin iad; ach 's cinnteach leinn nach bi an dùsgadh milis; agus is eagal leinn nach Bliadhna mhaith ùr—ach bliadhna ro dhona truagh a tha f'an comhair-san.

'N uair a bha sinn dìreach a' gabhail mu thàmh chuala sinn ceòl ro thiamhaidh, mhillis a' tighin oirnn air oiteig na h-oidhche á talla bha dlùth dhuinn. Dh'éisd sinn gu furachar agus chuala sinn gu soilleir na rannan a leanas.—

"O! gur mi tha fo sinuairin,
Agus m' intinn air gluasad le bròn;
Le bhi 'taicinn m'an cuairt domh
Mòran pheacach a' gluasad 's a' cheò:
Tha iad aotrom 'us luaineach—
Tha iad 'greasad gun smaoineach 's an ròd,
'Bheir gu dòruinn bith-bhuan iad,
Far nach cluinn iad guth suaimhneach no ceòl.

"Tha na cleachduinnean gràineil,
'Us na mearachdan b' àbhaist gach uair,
Air an leanachd le càileachd,
'S iad comb-ionnan ri nàdur an t-sluaigh:
Cha drùigh teagasg a' Bhlobnill
Air an aigne, tha 'n intinn co cruaidh,
Is gur dòmhain bhi 'trì riù.
Mar tig Spiorad na firinn a nuas.

"Tha cuid a' briseadh na Sàbaid,
'Us cuid eile a' sàsach' am miann;

Dream ri miounaibh le h-àrdan,
'Us gu bréngan tha àireamh a' fiar';
Cuid ri gaduidheachd thràilleil,
'Us do'n mhisge tha pàirt dhiubh a' strìochd',
'S cha 'n 'eil aon de na h-à'th'ntibh.
Nach 'eil iad 'saltairt fo'n sàiltibh gach ial.

" 'Us aig toiseach na bliadhna
Cha 'n ion-mholta, 's cha chiatach a' m' shùil;
A bhi 'faicinn nan riagh'ltean,
'Tha mar reachdaibh o'n diabbol 's an dùth'eh;
Theid na h-òigfhir gu h-iomain,
Chum 's gu'm fògair iad bioran nach fiù;
'S e fuil a dhòrtadh, gu minic,
'Chuireas 'ghòraich 's an iomairt air chùil.

" Ann an duibhre an anamoich,
Ged bhiodh uisge ro gharbh ann 'us ceò,
'Chumadh daoine o'n t-searoinn,
Do nach gaolach bhi 'leanmhuinn na cò'r,
Theid gu sunndach do'n talla,
Far an cluinn iad mòr chaithream 'us ceòl,
'S bheir an oidheche 'n an caithris,
Gun bhi claidhte le cadal gu lò.

" O! a dhaoine neo-chiallach,
C' uim' co a trom, mhi-rianail gach lò,
'Toirt ur culthaobh ri Crìosda,
Agus 'rùnach bhi 'riarach' na feòl?
Bheir am bàs sibh gu strìochdadh,
'S theid ur càradh glè tosal fo'n fhòid;
'S theid an t-anam mi-dhiadhaidh
Fhuadach dhachaidh gu prìosan a bhròin !

" Cha 'n e masladh no tamailt
A tha agam 's an Dàn so 'am rùn;
'S ann an caoimhneas 's an càirdeas
'Tha mi 'labhairt co dàn' ri m' luchd-dù'ch'.
Dh' fheuch an teicheadh iad tràthail
O an cleachduinnibh gràineil nach fhiù;
Agus gabhail ri slàinte,
Mu'n teid geata nan gràs orra dhùn'."

D. Mc F.

II.

MU CHOR NAOIDHEINEAN AN DEIGH A' BHAIS.

Ciod e cor an àireimh mhòir de'n chiuine-daonna a tha air an gairm air falbh ann an tùs an òige—mu'n urrainn iad dealachadh a chur eadar am maith, agus an t-òc—ris na naoidheinean sin a tha mhàin a' fosgladh an sùl air an t-saoghal so gu cead deireannach a ghabhail de 'aoibhneis 'us de 'thrioblaidean faoin? Is iomad athair brònach 'us màthair dhéurach a tha 'feòraich na ceisde so le mòr iomaguin an uair a tha, theagamh, an ceud-ghin air a ghrad ghearradh as—an uair a tha aighear an sùl air fholach uatha ann an dubh dhorachadas na h-uaigne. Agus a bhàrr air pàrantan a tha 'caoidh an cloinne tha gach duine anns a bheil tuigse no

smaoin—gu h-àraidh gach duine aig a bheil a' bheag a shuim mu rioghachd Chrìosd—deònach air fios a bhi aige ciod a tha 'tighin ris na mìltean do-àireamh sin a tha 'fàgail an t-saoghail ann an leanabas. Tha pailt dara leth a chinne-daonna gu léir air an gearradh as ann an làithean na h-òige, mu'm bheil iad a' tighin gu h-uirbhidheachd, no gu àite dhaoine. Nach mòr a' cheisd matà, am bheil iad so gu leir ri bhi 'fulang a' bhàis shìorruith amhuil a tha iad a' fulang a bhàis aimsireil, no'm bheil iad air an deanadh 'nan cloinn do Dhia trid Iosa Chrìosd, agus a' mealtuinn na beatha shubhainn?

Cha 'n 'eil sinn a' gabhail os làimh a' cheist so a làn shocrachadh—freagairt dhearbhta nach urrainnear cur na h-aghaidh a thoirt oirre air aon taobh. Ach cuiridh sinn fa chomhair air luchd-léughaidh na nithean sin a tha 'toirt oirnn féin deadh dhòchas altrum a thaobh cor sìorruith nan naoidheinean a tha air an gearradh as leis a' bhàs.

Tha e soilleir gu bheil naoidheinean a' toirt a steach do'n t-saoghail nàduir thruaillidh, aingidh—nàduir a tha mar so air a dhruideadh a mach o làthaireachd an Dé naoimh; agus a tha fo dhiteadh.—“An nì sin a tha air a bhreith o'n fheòil is feòil e.”—Eòin iii. 6. “Féuch ann an éuceart dhealbhadh mi, agus ann am peacadh ghabh mo mhàthar mi 'na broinn.”—Salm li. 5. Agus tha 'n fhirion chéudna air a leigeil ris dhuinn ann an òrdugh an Tìmhchioll-ghearraidh o shean, agus a' Bhaistidh 's an Eaglais Chrìosduidh. Oir c'arson a bha leanabh air a thimhchioll-ghearradh, no air a bhaisteadh mur robh féum aige air glanadh? Tha naoidheinean mar so neò-ghlan; agus ma tha iad ri bhi air an sàbhaladh 's ann trid na fireantachd sin a dh'òibricheadh a mach le Chrìosd, agus tre ath-ghineamhuinn an Spioraid: oir cha'n 'eil ainm eile air a thoirt fo nèamh tre 'n urrainn neach a bhi air a thèarnadh ach ainm Chrìosda. “Ach cha chomasach do naoidheinean creidsinn 'na ainm-san, no gabhail air dhòigh air bith ris an fhirion a tha a' naombachadh. Cia mar matà is urrainn dhoibhsan a bhi air an saoradh tre Chrìosd?” ‘Se so matà réusnachadh sònruichte a chuala sinn acasan a tha 'gleidheil a mach nach 'eil naoidheinean air an sàbhaladh. Ach cha réusnachadh e aig a bheil mòran stéigh, no gruinnid ma bheachdaicheas sinn air. Cha'n 'eil naoidheinean comasach air an fhirion a chreidsinn—air gabhail rithe no air a diùltadh. Cha'n 'eil iad comasach air a tuigsinn 's a bheag no 's a mhòr; agus uime so cha 'n urrainn gu'm bi iadsan air an agairt air son am mì-chreidimh; a chionn tha Dia a' gabhail ri neach a réir an nì a tha aige, agus cha 'n aun a réir an nì nach 'eil aige.

A rithis cha urrainn iad a bhi air an naombachadh tre 'n fhirion, a chionn nach 'eil iad comasach air an fhirion a thuigsinn. Ach gu cinnteach feudaidh an Spiorad sin a tha Uile-chumbachdach—a tha comasach air oibreachadh gun mheadhonan co maith agus tré mheadhonan an anaman-san a naombachadh air dhòighean eile—as eugais na firinn.

Tha mearachd mòr agus tur anns an réusnachadh ud mn'm bheil sinn a' labhairt, agus 's e so e:—gu bheil e a' càradh ri naoidheinean nithe nach 'eil an Sgrìobtur a' labhairt umpa-san idir; ach a mhàin mu'n fheadhain sin a thainig gu tuigse—gu bliadhnachan, agus gu céill. Tha creidimh agus ùmhlachd na fìrinn air an iarraidh orrasan a thainig gu tomhas aois' agus réusain—aig a bheil buaidhean agus aiguidhean freagarrach air son drùghadh a bhi air a dheanamh orra leis an fhìrinn ann an làimh an Spioraid; ach 's ann orrasan a mhàin. Agus tha sinn a' deanamh dh'e nach 'eil na nithean ud a' cur soluis air bith air cor naoidheinean—nach buin iad idir dhoibh.

Theid sinn a nis air ar n-aghaidh céum eile, agus their sinn gu bheil e coltach o'n dòigh anns an do dhlùth-cheangail Dia féin clann ri'n aithrichean—àl ri h'àl; agus eadhoin linn ri linn de'n chiun-daonna o theiseach an t-saoghail gu'm feud cor sìorruith naoidheinean a bhi ann an tomhas mòr air fhilleadh a steach ann an cor am pàrantan, eadhoin mar a chì sinn gu bheil an cor aimsireil.

Cha 'n 'eil sinn ag ràdh uime so ach gu bheil a' chùis coltach. Ach seallamaid air an dà Chùmhnanta mhòr a rinn Dia ris a' chionne-daonna—Cumhnant nan gnìomh ri Adhamh, agus Cumhnant nan gràs ris an Tighearn Iosa Crìosd; agus gheibh sinn tuille soluis air a' chùis. Sheas Adhamh, cha 'n ann a mhàin air a shon féin ach air son a shliochd—air son a shliochd uile—òg agus sean—beag agus mòr—agus tha na h-nìle d'a shliochd—eadhoin an leanaban maoth nach d'rinn maith no olc a' fulang air son tuiteam Ahaimh co luath agus a tha e 'tighin a stigh do'n t-saoghal dhubbach, dhéurach so. Air an làimh eile, sheas Crìosd, cha 'n ann a mhàin air a shon féin, ach air son nan uile a thug Dia dha. Agus cha 'n fhaic sinn c'arson nach 'eil e co comasach, 's co coltach gu'm biodh naoidheinean a' tarruing bheannachdan o'n dara Adhamh, agus gu'm biodh iad a' tarruing truaighe o'n cheud Adhamh—gu'm biodh iad air an saoradh leis an dara Ceann-cùmhnant', 's gu'm biodh iad air an dìteadh leis a' cheud Cheann-cùmhnant'. Cha 'n ann air an gnàthachadh féin, ach air gnàthachadh an fhir-ionaid—an urrais—a tha Dia a' sealtuinn ann an aona chùis dhiubh so; agus uime sin tha e chearta co furasda chreidsinn 's a thuigsinn gu'm faigh iad beatha o'n dara fear-ionaid, agus a tha e gu bheil iad a' tarruing bàis o'n cheud fhear.

Theireamaid nas faide fhathasd. Dh'aithn Dia féin naoidheinean a bhi air an gabhail a steach d'a Eaglais fo'n t-seann-Tiomnadh tré òrdugh an Timchioll-ghearraidh. Nach 'eil so a' ciallachadh gu'm feudadh iad na beannachdan sin a shealbhadh air an robh an t-òrdugh ud na shamhladh—gu'm faodadh iad a bhi air an ath-ghineamhuinn, agus mar so a bhi air an sàbhaladh? Tha dearbh chinnt aguiun gu bheil so air a chur an céill gu soilleir leis an Timchioll-ghearradh, agus gu'm biodh e 'an aghaidh gach beachd ceart air fìrinn Dhé a shaoilsinn gu'n cuireadh e mar

so *samhladh* no *sgàile* air beannachd fa chomhair a shluaigh do nach robh ni riochdail no fìor a' co-fhreagairt. Tha 'n nì ceudna air a dheanamh fathasd nas soilleire dhuinn leis a' Bhaisteadh fo'n Tìomnadh Nuadh. Ach a chionn gu bheil àireamh bheag ann a tha 'g àicheadh Baistidh do naoidheinean cha 'n abair sinn tuille mu'n bheachd so aig an àm. Is leòir leinn a ràdh—nì nach 'eil duin' air bith ag àicheadh—gu'n d' àithn Dia féin naoidheinean a ghabhail a stigh do'n Eaglais fhaicsinnich; agus mar so gu bheil e ag innseadh dhuinn gu'm feud iad a bhi air an gabhail a stigh do'n Eaglais fhìor agus spioradail agus nèamhaidh.

An fhad 's a chaidh sinn fathasd cha do dhearbhadh sinn nì air bith ach gu'm *feud* naoidheinean a bhi air an *tèarnadh*—gu bheil e uile-choltach gu bheil iad air an saoradh: ach cuiridh sinn a nis a sìos dearbhadh no dhà, air gu bheil feadhain dhiubh gu cinnteach air an ath-ghineamhuinn—air an naomhachadh—agus mar so air an sàbhaladh le slàinte shìorruith.

Seallamaid air a' chunntas ro dhrùigheach a tha aguin (Marc x. 13—16) air cainnt agus gnìomh ar Slànuighfhir. “Thug iad d'a ionnsuidh leanabana chum gu'm beanadh e ri u” —no *naoidheinean* mar a tha aguin ann an Lùcas xviii. 15. ‘S iad clann ro òg a bha ann—*naoidheinean* air an *tabhairt*, air an giùlan le'm pàrantan. “Thubhairt e, Is an d'an leithidibh a tha rioghachd Dhé. Agus ghlac e 'na uchd iad, agus bheannaich e iad.”

A nis gun ghuth a ràdh mu na briathran sin—“Is ann d' an leithidibh sin a tha rioghachd Dhé,” ged a dh' fheudtadh mòran a stéigheachadh orra faiceadhmaid cìod a rinn e—ghlac e 'na uchd iad, chuir e làmhan orra (Mata xix. 15) agus bheannaich e iad. Cha 'n fhoghainn a ràdh mar a their feadhain, nach ann mar an Slànuighfhear ach a mhàin mar dhuine aig an robh cridhe caomh, teòisneach ri cloinn a rinn e so. Cha 'n ann mar dhuine; ach mar dhuine agus mar Dhia—mar an *Criosd*—mar an Slànuighfhear—mar an Tì aig an robh cumhachd agus ùghdaras co maith agus an toil gu beannachdan a bhuileachadh air clanna nan daoine a rinn e an gnìomh a bha ann an so. Agus gu cinnteach tha cridhe cruaidh, agus intinn dhàna aig an duine sin nach faic ann an so dearbhadh air fìor ghràdh Chrìosd do chloinn—nach aidich an uair a bheannaich e iad gu'n robh iad da rìreadh air am beannachadh leis na tìodhlacan a b' àirde, agus a b' fhèarr—an uair a chuir esan a làmhan orra gu'n do bhuilich e an Spiorad Naomh' orra.

Tha aguin ann an so matà naoidheinean a bha air am beannachadh agus air an naomhachadh le Crìosd féin. Ach nas faide na so fathasd. Bha Eoin Baistidh air a lìonadh leis an Spiorad Naomh, eadhoin o na rugadh e (Lùcas i. 1b); agus bha Ieremiah mar an ceudna air a chur air leth o bhroinn a mhàthar, Ierem. i. 5. Tha aguin ann an so cunntas mion agus soilleir—cauntas nach urrainn neach air bith fhìradh no àicheadh air dà naoidhein a bha air an naomhachadh le Spiorad Dhé. Cha robh a h-aon diubh a' gabhail ris an fhìrinn—'s e sin ri toil fhoillsichte Dhé—

oir cha bu chomasach iad air urrad agus eòlas a ghabhail oirre. Cha b'aithne dhoibh am maith o'n olc—no an làmh dheas o'n làimh chli. Gidheadh anns an staid so—anns an inbh' so bha an nàdur air ath-nuadhachadh—air ath-ghinneamhuinn—air a naomhachadh le Spiorad Dhé.

Tha sinn a' faicinn mar so araon o'n t-Seann-Tiomnadh agus o'n Tiomnadh Nuadh gu'm feud naoidheinean a bhi air an naomhachadh—a bhi air an sàbhaladh—seadh, gu'n robh feadhain dhiubh air an sàbhaladh. Cha 'n 'eil ni air bith 'n an cor-san, no ann am frithealadh rioghachd nan gràs a tha 'ga bhacadh so. Agus an uair a smaoinicheas sinn cia fada an dealachadh a tha eadar leanaban nach do chuir 'an gnìomh aona pheacadh riamb, agus daoine a tha le'n toil, 's le'n deòin a' peacachadh an aghaidh soluis agus coguis—a rithis air luach neo-chrìochnach an anama—agus gu h-àraidh air tròcair ar Dé—air gràdh do-labhairt an t-Slànuigh-fhir ghràs-mhoir—gu cinnteach chi sinn gu bheil e mòran, mòran nas faide a réir frithealaidh nan gràs—a réir na bheil air innseadh dhuinn mu'r n-Athair nèamhaidh gu'm biodh naoidheinean air an tèarnadh—na tha e gu'm biodh iad air an sgrios gu sìorruith an uair a tha éifeachd ann am fuil an Uain gu'n sàbhaladh, agus a dh'fheudas an anama a bhi air an naomhachadh leis an Spiorad.

Cha lean sinn a' chùis nas faide aig an àm. Ach their sinn so; an uair a tha geata nèimh fosgailte do na leanabaidh—an uair a tha 'm Fear-saoraidh caomh ag iarraidh an toirt d'a ionusuidh-san—is ro eagallach da rìreadh cruadhas-cridhe—neo-mothachalachd, agus trom-chionta nam pàrantan mì-nàdurra sin nach cuir urrad, agus aon ùrnuigh a suas ri Dia air son gu'm biodh e 'na Athair do'n leanabanaibh—gu'n gabhadh e riù ann an Crìosd, agus gu'n naomhaicheadh e iad le 'Spiorad saor fèin.

Agus dhoibh-san a choisrig an clann do Dhia tré chreidimh agus ùrnuigh ann an tùs an òige, ach a tha car ioma latha tùrsach, déurach a' caoidh an cloinne a chionn nach 'eil iad ann, theireamaid gu'm feud iad sealtuinn a suas le deadh dhòchas—le dòchas agus creidimh gu'm bheil na failleinean maotha sin a chaidh atharrachadh o fhonn fuarraidh, 's o shìon gaillionnach an t-saoghail so mu'n tainig iad fo mheas no fo bhlàth, air an suidheachadh anns a' Phàras nèamhaidh, far am bheil iad n an craobhan fireantachd a' giùlan trom thoraidh gu cliù agus glòir an Tighearna—gu bheil an solus aig, ach fann, a dhealraich car prìbe orra-san an so le gath co milis, ach a ghrad smàladh as ann an duibhre na h-uaihe a nis a' dealradh mar a' Ghrian ann an rioghachd an Athar nèamhaidh. Na deanadh iad bròn matà mar iadsan aig nach 'eil dòchas.

F. B.

III.

“GU RUIGE SO CHUIDICH AN TIGHEARNA LEINN.”

“Tha Dia ro chaomh 'n uair bheir e seach',
 'S gu dearbh tha 'dhiùltadh làn de ghràdh;
 'S fìor bheannachd ann an atharrach' dreach
 Gach crois 'us creach a thig o 'làimh.”—*D. Buchanan.*

BHO cheann a nis dlùth air ceud bliadhna, bha làmhnaidh dhìchiollach, onorach a chòmhnuidh ann an cearn iomallach de'n Ghàedh-ealtachd. Bha teaghlach ro lionmhor aca, agus aig an àm an do thachair na bheil sin a' dol a dh' aithris, bha iad uile neo-chomasach air cuideachadh a dheanadh leò. Bha 'm bothan beag anns an do rugadh an leanabaibh gaolach, agus anns an do mheal iad ioma bliadhna thoil-intinneach, air a thogail ann an gleann domhain, agus air gach taobh dh'e bha creagan corrach, a' dìreadh ri àirde nan spéur. Anns an t-samhradh 's beag nach biodh am bothan so air fholach gu buileach leis a' bheithe, leis a' chailduinn, 's leis an rainich a bha 'fas gu h-ùrr, dosrach mu'n cuairt air. Cha robh còmhnuidh eile mar dhà mhìle dhoibh, 's cha robh guth r'a chluinntinn o mhoch gu h-anamoch ach torman an ùilt a bha 'ruith seachad air an dorus, ceileirean suundach nan eun, agus theagamh a nis 's a rithis, fead a' chiobair. Ach 'n uair a thigeadh an deireadh fogharaidh, 'sa sheargadh duileach nan craobh, 's gach lus, 'us neoin-ein bha 'fas mu'n cuairt orra—a thùirlingeadh an geamhradh le 'oidich' fhada 's le làtha goirid— a thigeadh sneachd 'us reothadh, 's a bhiodh, mar gu'm b' ann, tosdachd a' bhàis air gach nì mu'n cuairt doibh, 's gann gu'm faicte àite air bith a bu ghruamaiche 's a bu neo-aoidheile coslas na'n gleann so.

Beagan mhiltean o'n bhothan so bha 'n “Tigh-mòr,” far an robh “Pean a' bhaile”—bean-usal cheanalta, thruacanta, a bha s'an àm so 'na bantraich—a chòmhnuidh. Anns an earrach 's anns an fhogharadh, n uair a bha féum aig a' mhnaoi-uasail air seirbhis Eoghain bhàin, (oir b'e sin ainm an duine) bha i 'toirt obair dha; ach ré na cuid eile de n bhliadhna bha e gun chosnadh seasmach air bith. Cha robh ach gann eòlas air bith aig na Gàedheil air giullachd a' Bhuntàta 's an àm ud. Cha robh aca gu bitheanta ach na sholairaidh iad le iasgach 's le sealgaireachd, mach o chàl glas a' ghàraidh; agus mar sin dh'fhiosraich iad ioma deuchainn agus cruaidh-chas; agus Eoghan 's a theaghlach co maith ri'n coimhearsnaich. Gidheadh am meadhon gach sàrachadh, 's gach éigin 'san robh iad bha iad a' mealtuinn sonais; oir bha sith Dhé 'gabhail còmhnuidh maille riu. Mhothaich iadsan da rìreadh aig caochladh amanan gu bheil Dia 'na “chobhair ro-dheas ann an teanntachdaibh.”

Aig àm àraidh thachair gu'n robh teaghlach Eoghain ann an

éigin ro chruaidh. Ged a bha 'bhean cùramach, caomhantach, gidheadh thainig am beagan lòin a bh'aca gu crìch, gun bhràth air bith air tuille fhaotuinn. Thug i 'n greim mu dheireadh do na pàisdean, gidheadh cha robh i fo dhiobhail nìsnich, oir bha "fhios aice co ann a chreid i." Dh'fhòghlum i earbsa á caoimhneas-gràidh Iehòbbah, a' creidsinn gu'n d' "thig Dia ri h-aire, 's nach aire 'n uair a thig e." Thainig an oidhche, ach cha d'thainig furtachd no fuasgladh. Thòisich na pàisdean air glaothach air son an suipeir; ach 'n uair nach robh nì air bith aca r'a fhaotuinn thuit iad nan codal. Bha Eoghan air a thilgeadh sìos gu mòr. Mu dheireadh, au déigh dha toirt thairis le trioblaid 's le iomaguin thug an cadal leis e; a' fàgail a mhnatha na suidhe na h-aonar, agus gu diblidh, a chois na cagailt. Ach cha robh i 'na h-aonar; oir eadhoin anns a' bhothan neo-chuanda, agus uaigneach ud bu tric a mheal i co-chomunn sòlasach ri Dia. Bhrosnaich i 'n gealbhan a bha air caitheadh gu eibhleig no dhà, agus chàirich i beagan de na caorain chruaidh, thioram a bha 'n "cùil-na-mònadh" mu'n cuairt air. Thug i 'n sin leatha a Biobull Béurla (oir anns an àm sin cha robh na Sgrìobtuirean 'an Gàelic); agus an déigh guidhe air an Tighearna gu "fosgladh e 'sùilean, chum 's gu faiceadh i nìthe iongantach o lagh," dh'fhosgail i 'n Leabhar Naomha. B'e cheud chuibhrionn air an do dheare a sùil, "Oir is leamsa uile bheathaiche na frìthe, agus an spréidh air mìle sliabh." Rinn an earrann so greim ro iongantaach air a h-intinn, air chor agus ged a léugh i ioma cuibhrionn eile gu'n robh i so os an ceann uile 'n a smuaintean. Chaidh i mu dheireadh air a glùinean, agus thaom i mach a cridhe 'na làthair-san a dh'éisdeas agus a fhreagras ùrnuigh nam boehd. Ghabh i ris am Biobull agus léugh i ioma earrann o'n trie a fhuair i comhfhurtachd 'an àm a h-aire; ach bha na briathran, "Oir is leamsa uile bheathaichean na frìthe," &c., &c., a' fuadach gach nì eile as a h-aire. Bhuaich i mar so a' léughadh 's a' gleachd ri Dia ann an ùrnuigh gu briseadh na faire.

Mu ghlasanaich an latha thainig bualadh cabhagach 's an dorus. "Cò tha 'n sud," arsa bean-an-tighe. "Cha 'n eil ach caraid (ars) an neach a bha muigh) thigibh a mach gu luath 's cuidichibh leam." Dhùisg i Eoghan gu grad, agus chaidh iad araon a mach. Mu choinneamh an doruis bha brogach de dhròbhair còir 'na sheasamb, le 'chù fad-earballach r'a thaobh; agus mu thuairteam leth-dusan slat o'n tigh bha dà-bhliadhnach daimh a thuit thairis air an sgòrr chorraich a bh'air dara taobh a' ghlinne 'na shìneadh le 'chois briste, agus air a bhruthadh, 's air a phronnadh. Bha 'n dròbhair air a thuras gu Sasunu le tréud mòr spréidhe, agus bha e 'na leithid de dh'imcheist a thaobh na tubaist dhosguinich a thachair 's nach robh fhios aige ciod a dheanadh e. Bha Eoghan 's a bhean co duilich air son calldach an dròbhair 's gu'n do dhì-chuimhnich iad aig an àm an cor boehd féin. Mu dheireadh, thuirt an dròbhair, 's e 'tionndadh ris a' mhnaoi 's a' sgioblachadh a' bhreacain uime, "Matà 'bhean chòir cha 'n fhaic mi ciod is fearr is urrainn

ni dheanamh ris na *ghibht* ort féin; agus theid mis' am bannaibh gu bheil *mart-mairbhe* agad nach deach riamh a leithid air do sheal'-aich." Gun feitheamh ri urrad agus buidheachas fhaotuinn, *sgrog* e 'bhoineid-bhiorach mu 'bhathais, chuir e smug 'na dhorn, agus ghreas e air aghaidh an déigh an tréud!

Dh'ambaire Eoghan 'sa bhean air a chéile—lìon an sùilean, agus cha b' urrainn iad diog a ràdh car tacain, 'n uair a thug iad fainear an nì iongantach a thug esan a tha "fosgladh a làimhe 's a' sàsachadh miann gach nì beò" mu'n cuairt. Bha nis an ùr-nuighean air an tionndadh gu moladh; agus b'e cheud ni a rinn iad an giùinnean a lùbadh chum an taingealachd a dheanadh aithnichte do Dhia. 'An àite tuireadh agus caoirean na gorta, 's ann a bha nis "guth subhachais agus fonn ciùil" r'a chluinntinn 's an fhàrd-aich so. Bha nis de dh' fheòil aca na dh' fhòghnadh fad ioma mìos; agus 'n an aoibhneas dhì-chuimhnich iad gun robh iad gun deann mine. Ach cha d'rinn esan a dh' àithn do na fithich aran agus feòil a thoirt a dh' ionnsuidh an fhàidhe anns a' mhaduinn agus anns an fheasgar dearmad air an nì so; oir 'n uair a thòisicheas Dia air obair cha 'n fhàg e i leth dheanta.

Mu shea uairean 's a' mhaduinn thainig an ath bhuaidh 'san dorus. Chaidh an dorus fhosgladh gu grad, agus cò bha aige ach aon de ghillean an "Tigh-mhòir," le eallach trom air a mhuin. "Ciod a tha cearr mar a tha thu air ghluasad co moch?" dh' fheòraich Eoghan. "Leig a stigh mi gus a faigh mi cuite 's an t ultach so, (deir esan) 's an sin innsidh mi dhuit ciod a chuir air ghluasad co moch mi. 'S a' mhaduinn an dé dh' fheòraich 'Bean a' bhaile' dhìom am b' fhiosrach mi an robh an teaghlach so uile 'n an slàinte? Dh'innis mi dh'i, co fad 'sa b' fhiosrach mise gu'n robh sibh gun aobhar thalaich. 'Matà 's iongantach leam ma tha (deir ise), oir cha robh iad tiota as mo smuaintean an dé no'n diugh, agus tha mi ion 's cinnteach gu bheil iad ann an teanntaehd éigin. Gabh thus 'an poca so agus faic ac' e co luath 's is urrainn duit, agus thoir fios am ionnsuidh cia mar tha iad; oir tha mi cinnteach gu'm bàsaicheadh iad mu'n sineadh iad an làmh gu nì air bith nach leò féin.' Leis na bha aguinn mu làimh an dé cha d' fhuair mi tighin, ach chuir mi romham gu'm bithinn agaibh an diugh moch gu leòir."

Thuig bean Eoghain a nis seadh nam briathran a bha co mòr na smuaintean an oidhche roimhe so, "Oir is leamsa uile bheathaichean na frithe, agus an spréidh air mìle sliabh." Chunnaic i mar an céudna mineachachadh soilleir, anns na thachair, air na briathran sin a tha 'g ràdh gu bheil "eridheachan nan uile dhaoine" an làimh Iehòbhab, agus gu'n "tionndaidh e iad mar shruth uisg' an taobh is àill leis." Chunnaic iad gu soilleir làmh an Tighearna anns gach nì a thachair; agus am feadh a bha iad, mar bu chubhaidh dhoibh a bhi, ro thaingeil dhoibhsan tré an d' thainig cobh-air thuca, thug iad a' ghlòir uile do "Athair nan tràcair," o bheil "gach uile dheadh thabhartas, agus gach uile thiodhlac iomlan a'

teachd.” Ann an so bha dearbhadh soilleir aca air frinn briath-
an an duine bheannaichte, *Iain Newton*; 's e sin, “Ma bheir sin
freasdal an Tighearna fainear cha bhi sinn gu bràth gun a fhreasd-
al aguinn r'a thoirt fainear.”

Air eagal 's gu'm faod neach air bith a bhi co dall 's gu'm bi e
'saoilsinn gu bheil na chuir sinn an céill a' toirt misnich dha buan-
achadh ann an leisg, 's ann an lunndaireachd (do bhrìgh gu bheil
an Tighearna co fial le 'thròcairean) theireamaid ris nach 'eil a'
mhisneach a's lugha dhasan anns an sgéul so. Cha 'n urrainn
duine air bith amharc ri Dia air son còmhnaidh mar d' rion e féin
na bha 'na chomas gu lòn a sholar d'a theaghlach; agus cha 'n e
mhàin a' saothreachadh, ach mar an ceudna a' deanamh an fhéum
is fearr is urrainn e d'a chosnadh—gun bhi caitheadh peighinn
d'e air 'anamiannaibh, no ann am faoineis. Nach uamhasach r'a
thoirt fainear nach lugha na trì cheud mìle punnd Sasunnach a tha
'g a chosd 's a' Ghàedhealtachd gach bliadhna air deoch bhuaireas-
aich a mhàin? Nach 'eil gach aon a tha 'cumail suas a' chleachd-
aidh mhilltich so aig àm anns am faca Dia iomchuidh a làmh a
leagail oirnn co trom a' toirt, mar gu'm b' ann, dùlan d'a Mhòr-
achd-san, le bhi 'toirt an gnùis do chleachdadh a tha co calg-dhìr-
each 'an aghaidh aobhar Chrìosd, agus maith a chinne-daonna?
Tha rithis pìobadh 'us cagnadh *Tombaca* a' cosd ach beag urrad
do na Gàedheil ris an dìbh làidir fèin; agus ged nach 'eil e co
cronail 'na ghnè ris an deoch, tha e cheart co beag feum. Nach
'eil na cisean a chuir nàdur oirnn a thaobh lòn agus eudaich trom
gu leòir ged nach bi sinn 'g an cur an lìomhoireachd?

Feudaidh e bith gu bheil cuid a' saolsinn gu bheil an cruaidh-
chàs 's a bheil iad 'na lethsgéul iomchuidh gu an làmh a shineadh
a mach gu greim a dheanamh air an nì nach leò fèin gu freasdal
air an uireasbhuidhean; agus da rìreadh tha sinn ag aideachadh
gu bheil e na chor co déuchaineach 's anns an urrainn pàrant a
bhi air a shuidheachadh a bhi faicinn a leanabaibh a' fulang an ac-
rais 's gu'n dòigh air fuasgladh orra; ach cumadh iad 'n an cuimh-
ne gu'n d' thuirt Dia, “Na dean gaduidheachd.” 'N uair a thug
e an àithne so seachad cha d' thuirt e gu'n robh amannan ann 's am
faodadh daoine goid. Uime sin theireamaid, mar a thuirt neach
àraidh roimhe so,—“Mar urrainn duinn a bhi beò 's an t-saoghal
so gun lagh Iehòbbah a bhriseadh, 's ann mar is luaithe bhàsaich-
eas sinn is fearr e.”

Ann an co-dhunadh theirea'maid faecal no dhà gu comhfhurtachd
agus misneach a thoirt do'n chuid sin de'r luchd-dùthcha, agus
mo thruaighe! is lìomhor iad, a tha aig an àm so fo iomaguin,
's fo chùram a thaobh an teaghlaichean, gun fhios aca ciod mar
gheibh iad seachad an geamhradh. Tha dlùth air ceud bliadhna
mar a thuirt sinn cheana, o na thachair na nithean a chuir sinn an
céill; ach 's e “Dia an Tì céudna an dé, an diugh, agus gu sìor-
ruith,” oir tha “e gun atharrachadh, agus gun sgàile tionndaidh.”
Uime sin gnàthaichibh-se, leis gach uile dhìchioll, gach meadhon

laghail agus onarach gu lòn a sholar d'ur teaghlaichean—gleachd-aibh ri Dia gu dùrachdach, le creideamh agus le h-e bsa, ann an ùrnuigh. Cuimhnichibh ciod a thuirt an Salmadair:^a

“ Fìor eagal De biodh oirbh a naoimh;
Oir uireasbhuidh no dì,
Cha bhi air a luchd-eagail-san,
Fìor-chràbhhadh dha do ni.

Bidh easbhuidh air na leòmhnaibh òg,
'Us ocras air gach leth;
Ach air an dream a dh'iarra Dia
Cha cheilear aon nì maith.”

Ach feudaidh e bhi gu bheil Dia, air son aobhar sònruichte nach léur dhuinne 'n tràs', a' ceadachadh eadhoin d'a phobull féin a bhi air an sàrachadh le ioma deuchainn theinntich; ach tha e féin a' gealtuinn slighe gu dol as. Tha e 'g ràdh ris a' Chrìosduidh anns gach suidheachadh 's a bheil e, “ Is leòir mo ghràs-sa dhuit; ” agus “ A réir do latha bidh do neart.” “ Chuala sibh (deir an t-ab-stol Séumas) iomradh air foighidin Iob, agus chunnaic sibh crìoch an Tighearna; gu bheil an Tighearna ro thiom-chridheach agus tròcaireach.” Na saoileadh Crìosduidh air bith gu bheil a chor cruaidh do bhrìgh nach do bhuilicheadh maoin, agus saibhreas saoghalt' air.—

“ Cha mhaith a thig dha bhi fàs ro dhuilich,
Ged tha e fulang 's an àm;
Do bhrìgh gur h-i 'n làmh o'n seimh na builleann,
'S le 'n àill a bhuidhinn a th' ann:
No idir mar chàch bhi tàir, 's a talach,
'S ag ràdh 'S neo-thaitneach mo roinn—
Is mòr gur fearra pàirt an neach ud,
Gun chearr, gun chamadh tha 'chrann.”

Oir-crannchur no pàirt a's fearr do'n anam,
Gu bràth cha 'n fhaigh e fo'n ghréin;
No'n cuibhrionn chuir gràdh o'n àird air leth dha,
Ged tha e driseach gu léir;
Do bhrìgh gur h-i chrìoch th'aig Dia 's an amhare
Gach iarrtas agus gach spéis,
A thogail o thiom nan sìontan carach
Gu tìr a' gheallaidh air nèamh.”

“ O blaisibh agus faicibh gur maith an Tighearna: is beannaichte an duine sin a dh'earbas as.” “ Cuiribh-sa ur dòchas anns an Tighearna do ghnàth, oir anns an Tighearna Iehòbbah tha neart sìorruidh.” “ Earbaibh as anns gach àm a shlòigh uile; ” oir “ cha d' iarr e riamh air sliochd Iacoib aghaidh iarraidh ann an dìomh-ain!” Agus ma ni sibh sin, ged a bhios sibh euslainte, breòite—ged a bhios sibh gun eudach gun lòn, bidh gach aon agaibh com-asach air a ràdh ann an cainnt mhilis aon de Bhàrdaibh ur dùthcha féin,—

“ 'S tric a shearg mi fo euslaint, 's a ghuil mi fo bhròn—
'S tric a ghluais mi gu deurach gun eideadh gun lòn;
Ach dh'earb mi á Dia anns gach deuchainn 'us dùth,
'S an fhad so a Thighearna chuidich thu mi.

'S ioma caraid bu chaomh leam a dhìobair, 's a thréig—
'S ioma dòchas a b' ait leam a mheall mi le 'cheilg :
A-h do chàirdeas sa sheas anns gach doilghios 'us strì,
'S an fhad so a Thighearna chuidich thu mi.

Agus seallaidh mi romham, 'us gabhaidh mi beachd
Air gach deuchainn 'us àiradh tha fathasd ri teachd :
Ach m' anam fò gheilt, no fò im-cheit cha bhi ;
Oir an Dia uach do dhìobair cha dìobair e mi."

G. Mc C.

IV.

MU FHOGHLUM A THOIRT DO CHLOINN.

FHIR-THATHAICH Ionmhuinn.

Le dùrachd mo chridhe tha mi 'guidhe saoghal fad' an deadh bheatha dhuibh. Is ioma dubhachas 'us cianalas a dh' fhuadaich sibh uam o na thòisich sibh air ur teachdaireachd bhuadhmhor; agus bu mhinic a mhiannaich mi bhi 'n ur cuideachd 'n uair a ghabhadh sibh ur turas leis gach sgéul taitneach 'us earail fheumail a tha sibh a' toirt o mhios gu mìos do gach Gàedheil a ghabhas ruibh. Is cinnteach mise nach 'eil neach tuigseach air bith a dh' éisdeas ri'r briathran tùrail, druigheach nach 'eil ro thaingeil duibh air son ur saothreach.

Tha aon nì àraidh air son am bheil na Gàedheil fo fhiach-an sònruichte dhuibh, agus 's e sin, an dealas agus an dùrachd leis am bheil sibh a' sparradh air pàrantan an dleasnas a thaobh sgoil a thoirt d'an cloinn; agus cha 'n 'eil teagamh agam nach toir an t-àl òg am beannachd oirbh fathasd air son ur dilseachd anns a' chùis so.

Tha aon nì féumail a thug sibh fainear 's a' XV. Aireamh, 's e sin co féumail 's a tha léughadh na Gàelig do chloinn na Gàedhealtachd air son na Béurla a thuigsinn. Ged a tha gach nì thug sibh air aghaidh chum so a dhearbhadh co soilleir, gidheadh tha cuid de na Gàedheil fathasd ann am beachd gu bheil léughadh na Gàelig 's na sgoilean a' deanamh barrachd croin no maith do'n chloinn—gu bheil i 'cur tuille bacaidh orra na tha i 'deanamh de chuideachadh leò ann an ruigheachd air fòghlum. A chum a dhearbhadh do'n mhuinntir so gur h-iad a th' ann 'sa mhearachd bheir mi dhuibh an sgéul a leanas ann am fiughair gu'n toir sibh àite dha 'n ur duilleagaibh. Tha mi'n dòchas nach saoil, aon chuid sibh féin, no ur léughadairean, gur h-ann le h-uail a tha mi 'g a dheanamh.

Rugadh mise ann an cèarn iomallaich de aon de dh' eileanan taobh na h-àird an iar de'n Ghàedhealtachd. Bha m' athair mar a bha na coimhearsnaich 'am bitheantas, gun a bhi aon chuid ro bheairteach no ro bhochd. Bha seòrsa de sgoil air a gleidheil mu mhile o thigh m' athar. Bha 'n tigh-sgoil air a thogail de

sgrothan glasa, gun chòmhla ris an dorus no glaine anns na h-uinneagan. Chuireadh mise do'n sgoil so co luath 's a bha mi air chomas dol innte. Bha i 'tòiseachadh mu thoiseach a' gheamhraidh, 'n uair a bhiodh am bàrr cruinn 's a' bhuachailleachd seachad, agus a' stad mu dheireadh an earraich. Mar sin bha sinn tuille agus dara leth na bliadhna gun sgoil idir; air chor agus na bha sinn ag ionnsachadh an dara leth-bhliadhna gun robh sin ach beag a' dì-chuimhneachadh an leth-bhliadhn' eile. Bha bliadhna 'n déigh bliadhna 'dol seachad air an dòigh so; ach cha robh sinne 'buidhinn a bheag. Cha robh sinn a' tuigsinn, feudaidh mi ràdh, aon fhocal de na bha sinn a' léughadh; agus ged a bha 'maighstir-sgoil' e féin na dhuine tuigseach, fòghluimte, cha do ghabh e mòran suim, no dragh gu a mhineachadh dhuinn.

Ann an deireadh earraich 1829 chaidh an sgoil mu sgaoil mar a b' àbhaist, agus fhuair mise, coltach ri mòran eile, fuasgladh o'n chuing chruidh fo'n robh sinn; agus bu toilichte mi 'dol a bhuachailleachd a' chruidh seach leantuin air ionnsachadh *Grammar*; nì a shaoil mise a bha gun fhéum air bith ach a mhàin gu clann a pheanasachadh. Bha mi 's an àm sin mu cheithir bliadhn' deug a dh' aois, agus uaithe sin gu so cha do chaith mi latha ann an sgoil.

Seachduin no dhà au déigh do'n sgoil sgaoileadh cò 'thainig rathad an tighe ach am maighstir-sgoile. Bha sinn uile 'n ar suidhe mu 'n cuairt a' ghealbhain. 'N uair a chuir e fàilt' oirnn tharruing e leabhar a mach as a phòca. "Tha 'n so (deir esan) Comh-chruinneachadh fiachail Gàelig a chuir an diadhair urramach an t-Olladh Tormoid Mac Leòid, a chunnaic sibh an so an uraidh maille ri 'Caraid nan Gàedheal' an t-Olladh *Baird*, a mach, a chum maith nan Sgoilean Gàelig." Léugh e dhuinn "Eachdraidh Chailum Cille," "Sgéula Choire na Sithe," agus "Long Mhòr an Eilthirich." Thug e 'n sin a mach á pòc' eile duilleachan beag le còmhach uachdair buidhe air. "So (deir esan) a' cheud Aireamh de leabhar ri'n canar 'An Teachdaire Gae'lach' a tha r'a chur a mach gach mìos a chum eòlas agus fiosrachadh féumail a sgaoileadh feadh na Gàedhealtachd, agus a chum déigh 'us tog-radh a dhùsgadh 's an òigridh gu léughadh." Léugh e 'n Roimh-ràdh, "Còmhradh nan Cnoc," "Cuairt a' Mhinisteir Ghallda," "Fàilte na Cuthaige," agus gach Dàn 'us Gearr-sgéul taitneach eile 'bh' ann. Fhad 's a leau e cha robh diog r'a chluinntinn—bha gach beag 'us mòr le 'm béul 's le 'n sùilean fosgailte a' feitheamh gach facail, agus tha'r leam gu'n robh eadhoin na cearcan 's na h-eòin féin nì bu stòlda na b' àbhaist doibh. "Taing do'n Fhreasdail (deir m' ath-air) gu'n d' thainig an t-àm anns am bheil cainnt mo chridhe air a sgrìobhadh co deas 's co snasmhor, agus gu'n robh soirbheachadh 'us buaidh aig na daoine cneasda a tha saothreachadh co dileas chum ar leas a chur air aghaidh." Cha 'n urrainn mise cainnt a chur air na d' fhairich mi air an latha so; oir 's ann a bha mi mar neach a gheibheadh bith 'us ceudfaidhean ùra. Dhùisg iot' annam 'an tòir air fòghium nach caisgear fhad 's is beò mi; oir a dh'-

aindeon gach trioblaid, sàrachadh, agus cruaidh-chàs a thainig 'am charaibh lean an t-iarrtas so co dian 's a bha e riamh. 'N uair a dh'ionnsaich mi Ghàelig a léughadh, coltach ris a Cheannaiche òg mu'n d' thug sibh eunntas 'san dara Aireamh, thug mi aghaidh air a' Bhéurla, agus gun chòmhaidh o fhear-teagasg air bith ach Foc-lairean agus leabhraichean Gàelig, fhuair mi urrad eòlais oirre 's nach robh eiseamail agam ri Gall no Sasunnach a choinnicheadh mi. Lean mi air m'aghaidh, a ghnàth a' sìor mhèudachadh ann an eòlas. An uair a bha òganaich eile a' caitheadh an airgid ann an òl 'san *Tombaca*, bha mis' a' ceannach leabhraichean; agus 'n uair a bhiodh iadsan—an déigh an obair latha chur seachad—'n an ruith o thigh gu tigh, a' struidheadh an ùine phriseil ann an diomhanas 's am baath-shùgradh, bhithinn-sa 'mealtuinn cuid-eachd nan Diadhairean, nam Feallsanach, 's an Luchd-turais a b' ainmeile bha riamh 's an t-saoghal. Cha 'n 'eil mi idir a' saoil-sinn gu'n d' rinn mi na bu chòir dhomh gu "ath-cheannach na h-aimsir;" 's cha 'n ann le h-uail a tha mi 'labhairt mar so, ach le cridhe 'cur thairis le taingeachd do gach aon a tha saothreachadh chum fiosrachadh agus eòlas nan Gàedheil a chur 'am farsuiugeachd: oir tha mi 'creidsinn mar biodh an t-Olla Leòdach 's na bha 'saoithreachadh maille ris air deanadh na rinn iad, gu'm bithinn-sa air an latha 'n diugh co aineolach ri neach 's an Sgìr-eachd 's an do rugadh mi. Ciod a bhuannachd a bhiodh ann domhsa ged a sgrìobhadh na daoine urramach ud gach sgéul a dh'ainmich mi, ann am Béurla? Tha fios nach bitheadh buannachd air bith; oir cha robh aon fhaireachduinn an taobh a stigh dhìom ris am buineadh dìog dh'e. Ma bhios fìor iarrtas 'an déigh eòlais air a dhùsgadh suas eadhoin le léughadh na Gàelic cha ruig pàrantan, no maighstirean-sgoile leas a shaoilsinn gu'n sàsuichear e leis a' so. Cò iad am measg nan Gàidheil a tha 'm bitheantas 'g an dearbhadh féin 'n an sàr sgoileirean? Tha gun teagamh iadsan a bu mhotha bàigh ris a' Ghàelic 'an làithean an òige.

Tha cuid a' cumail a mach gu'm bheil a' Ghàelic 'na bacadh mòr 's na ceap-tuislidh roimh na Gàedheil; agus tha dòchas agam nach gabh sibh fearg rium 'n uair a dh'aidicheas mi gu bheil mi féin do'n bheachd so mar an céudna. Tha mi da rìreadh a' creidsinn gu'm biodh cor mo luchd-dùthcha mòran na bu ghealtannaiche nam biodh eòlas aig gach sean 'us òg dhiubh air a' Bhéurla, agus gur h-ann mar is luaithe 'gheibh iad á eiseamail na Gàelic is fearr e. Ach cha 'n 'eil mi air aon chor a' creidsinn gur h-i 'Ghàelic a ghlan spadadh an dòigh air so a thoirt mu'n cuairt. 'Na àite so tha mi 'creidsinn gur h-ann mar is motha a sgrìobhar 'sa léughar i—seadh, mar is mò ghnathaichear i gu ionmhais na Béurla fhosgladh suas do na Gàidheil is luaithe 'gheibh iad as a h-eiseamail. Agus a chum misneach a thoirt dhiubhse gu buanachadh ann ur saothair ghràidh a' toirt fiosrachadh d'ur luchd-dùthcha mu nithean a dh'àrd-aicheas iad mar dhaoine agus mar Chrìosduidhean, thug mi dhiubh an crioman beag so de dh'eachdraidh mo bheatha. B'urrainn

domh nithean a bu mhò innseadh mu chuid de m' luchd-eòlais; ach fàgaidh mi sin dhoibh féin r'a dheanamh, a's urrainn a chur an cèill mòran nas fearr nas urrainn mise.

'S i mo bharail féin gu bheil beatha Eoghain Mhic Lach-uinn, 's nan sgoileirean ainmeil eile air an 'd' rinn sibh ionradh aig caochladh amannan, a' deanamh tuille croin do dhà sheòrsa de na Gàedheil òga na tha e deanamh do mhaith dhoibh. Tha cuid 'n uair a léughas iad mu na sgoileirean so, a their, "Ciod a maith a nì e dhuinne bhi 'stri ris na daoine so?" C'ait' am faighear 'n ar latha-ne sgoileirean cosmhuil riutha sin?" agus do bhrìgh nach urrainn iad teachd an uisge na stiùrach dhoibh, paisgidh iad an làmhan agus cha d' toir iad oidhirp air nì air bith a dheanamh. Tha dream eile aig nach 'eil buaidhean intinn ro làidir; agus ged a ghnàthaicheas iad gach dìchioll a tha 'nan comas cha tig an latha 'thig iad mar astar dhoibhsan air an d' rinn sibh iomradh. Bhiodh e co glic do'n losguinn oidhirpeachadh air e féin a shéideadh suas gu mèudachd dainh, 's a tha e dhoibh so a bhi 'stri ri éiridh co àrd ri Eoghan Mac Lachuinn, ri Séumas *Ferguson*, ri *Edmund Stone*, no ri *Dr Alasdair Murray*.

Tha beachd mearachdach am measg mòran de na Gàedheil òga a thaobh fòghlum. Tha iad a' saòilsinn ma gheibh iad greim air beagan sgoil, gu'm bi iad 'n an "daoine-uaisle" 'chlisgeadh, s gu'm faod iad "làmhnan glan" a ghleidheadh fhad 's is beò iad. Anns a' bheachd so tha iad a' tighin do bhailtean mòra na Galldachd far am faigh iad, mar is trice, mach am mearachd. Tha mòran de na Gàedheil 'am barail nach 'eil ach cosdas gun stà ann a bhi lean-tuinn ionnsachadh mar faigh iad am beathachadh air a thàileadh. Mar so chì sinn pàrantan gu minic a' toirt sgoil 'us ionnsachadh do aon de'n teaghlach, 'n uair nach 'eil iad a' gabhail urrad suim de chàch, a ta co gràdhach dhoibh ris-san, 's a bheir dhoibh de sgoil na nì comasach iad air an litrichean féin a sgrìobhadh! Cha chòir do na nithe so bhi mar so; agus pàrant' air bith a tha mar so a' dearmad aoin seach aoin d'a theaghlach, tha e 'deanamh eucoir air nach gabh leasachadh ged a bhuilicheadh e beairteas nan Inns-ean air. Feòraichea'rraid de'n t-saoithriche bhochd a tha 'cosnadh 'arain le fallas a mhàla, ach a fhuair greim air beagan fòghlum, ciod a ghabhadh e air a shon; agus nach e theireadh e ruinn nach gabhadh oighreachd? Nach 'eil e gu minic, 'an déigh saothair chlaoidhteach an latha 'chur seachad, a' suidhe sìos le rìghbrean 's le prionnsachan mòra na talmhuinn, agus a' fòghlum o'n eachd-raidh-san gu bheil

“———tuille sonais ann an dùil,
Na th' ann an crùu le bhi 'na snealbh”

Tha cuid, gu ro mhearachdach, a' cumail a mach nach 'eil fòghlum 'na bhuannachd air bith dhoibhsan a tha 'cosnadh an arain làitheil le fallas an gnùise; a chionn gu bheil e 'g an deanamh mì-thoilichte le'n crannchur. Ciod eile ach eòlas farsuing, air a thogail air a firinn Dé, a bheir an neach a ta ann an inbhe isail gu bhi riarachte

le 'shuidheachadh? 'N uair a léughas e eachdraidhean a tha 'cur an céill fàs agus tuiteam rìoghachdan mòra an t-saoghail tha e 'faicinn gu soilleir dìomhanas gach cumhachd agus gach mòrhuish thalmhaidh. "Tha e 'faicinn (mar a thuirt neach àraidh roimhe so) nach 'eil mòran eadar-dhealachaidh co dhiubh a chluicheas esan a phàirt air ionad-cluiche na beatha so mar phrionnsa no mar dhuine bochd; ach gu bheil e 'na nì a tha thar tomhais cudthromach an do chluich e 'phàirt a thugadh dha gu ceart. Tha 'n saothriche tuigseach, iriosl a' mealtuinn slàinte cuirp; agus tha sàr-chothrom aige air meòrachadh air na nithean a bhuineas d'a chor sìorruidh. Tha e taingeil gu bheil e saor o iomadh buaireadh do'm bheil iadsan a tha 'caitheadh am beatha nas greadhnaiche buailteach.

'Sa mhaduinn chiùin, 's am fear fò dhriuchd ro throm
'S na h-eoin 'n an còisridh 'm bàrr nan òg 's nan tom,
Gu snundach ait gu'n tig e mach do'n raon,
'N deigh 'sgìos 's an oidhebe 'chur á chuimhn' gu faoin:
R'a obair chleachdta teannaidh e gun dàil,
A chuireas neart 'us fallaineachd 'na chàil:
'Us mian air maoin cha chràidh 's cha chlaoidh a' chrì,
'S e mealtuinn neart, 'us fallaineachd mar nì "

Ann an dòchas gu'n gabh sibh mo lethsgèul air son na litir so, a tha mòran nas faide 'na 'shaoil mi 'n toseach a bhitheadh i; agus a' guidhe "Bliadhna mhaith Ur" dhuibh féin 's d'ur càirdean lionmhor, Is mi, le mòr spéis, Ur seirbhiseach dileas agus umhal,—S.

[Tha sinn fad' an comain ar deadh charaid dhìleis a chuir an litir so d'ar n' ionnsuidh; agus is ioma taobh duilleig de'n "Fhear-thaithich" a rinn e nis a lionadh le nithean tuigseach, brìghmhor. Tha sinn ag aontachadh leis gach smid a tha e 'g ràdh mu fhéumalachd léughaidh na Gàelic: agus is aithne dhuinn iomad aon a fhuaire urrad bhuannachd o na leabhraichean a tha e 'g ainmeachadh 's a fhuaire e féin. 'S i a' Ghàelic gun teagamh air bith am fòr-dhorus do na Gàedheil a dh'ionnsuidh na Béurla—a chum ionnsachaidh 'us fòghlum. Agus an Gàedheil sin a tha 'féuchainn ri Béurla ionnsachadh gun chòmhaid na Gàelic tha e, 'an àite dol a stigh air an doras a ta fosgailte dha, dìreach a' cladhach troimh'n bhalla, no 'streapadh ri mullach an tighe gu dol a stgh air an luidheir. Tha'n dara slighe réidh, fosgailte, furasda: tha'n té eile cam, doirbh, deacair.

Ach tha aon nì a tha ar caraide ag ràdh ann an so ris nach 'eil sinn ag aontachadh—seadh a tha sinn gu buileach a'cur 'na aghaidh ann —'s e sin nach 'eil féum ann a bhì 'g aithris eachdraidh dhaoine cliùiteach, mar a bha Eoghan Mac Lachninn, *Dr Alasdair Murray*, agus na h-àrd sgoileirean sin eile cosmhuil riutha. Cha 'n 'eil iad ach ro ainmic 'an Gàedhealtachd no'n Galldachd a ghleidheas coiseachd ris na giomanaich ud; ach tha dearbh chinnt agunn gu bheil na ceudan a ghreasas an céum an uair a chì iad iad sud a' triall-imeachd co siùbhlaach thar bheann 'us ghleann. Féudaidh

corra ghiùgaire leisg, lunnach a bhi 'deanamh ro-fheabhas nan daoine urramach ud 'na leth-sgéul air son marsuinn gun char, gun ghluasad 'nan aineolas féin. Ach bithidh gach aon aig a bheil spiorad glan, no duineil air a bheothachadh, 's air a bhrosnachadh, gus na dh' fheudas e dheanamh 'n uair a chì i cia mòr a rinn na suinn ud.

Nach e eiseimpleir àrd, fhìor-ghlan, uile naomh, làn fhoirfe a tha 'n Tì uile-ghlic, uile-ghràsmhor a' cur fa chomhair chlanna nan daoine gu léir anns an fhìrinn? agus nach ann le bhi sìor choimhead air-san a bha naomh agus neo lochdach a tha sinn air ar stiùradh air an t-slighe gu foirfeachd?

B' fhearr leinn matà gu'n robh eachdraidh aguinn air tuille Ghàedheal a bha cliùiteach, agus cha bhiodh eagail air bith oirnn nach deanadh an aithris féum do dh' iomadaid de'n òigridh.—F. B.]

V.

SIR IAIN FRANKLIN.

THA nis dlùth air ceithir cheud bliadhna o 'na dh' oidhirpich maraichean a bhuineadh do'n Roinn-Eòrpa air slighe fhaotuinn gu Innsean na h-Aird an Ear le seòladh dìreach ann an cridhe na h-Airde Tuath. Bho làithean a' mharaiche ainmeil sin *Cabot*, gus an àm a ta làthair, is iomadh seòladair cruadalach, gleusda a d' fheuch ris an t-slighe so fhaotuinn a mach; ach a dh' aindeoin gach oidhirp a thug iad uile tha e coltach gu bheil iad co fad' o na bha iad ag iarraidh fhaotuinn 's a bha iad riamh. Gidheadh, an àite bhi 'call am misnich, tha iad co dealasach, eudmhor 's a bha iad riamh. “Tha iadsan a tha 'n an tàmh a' soilsinn gur iad féin is fearr làmh air an sdiùir;” agus mar sin tha daoine a tha déigh-eil air cliù agus urram fhaotuinn o'n comh-chréatairean a' dol a mach air lorg na slighe so co earbsach, dàna 's ged nach biodh duilgheadas air bith 's a' chùis. Mar is mò an cunnart 's ann is iarrtaiche ar luchd-dùthcha air dol 'na dhàil. Tha iad a' falbh le guidhe agus ùrnuigh gach aoin gu'n soirbhich leò; agus 'n uair a thilleas iad tha iad air am fàilteachadh le bàighealachd 's le càird-eas.

Anus a' bhliadhna 1553, sheòl duine misneachail a bhuineadh do Shasunn d'am b' ainm Sir Eoghan *Willoughby*, a chum gach for'ais a b' urrainn e dheanamh mu'n t-slighe so; ach mo chreach! cha do thill e dh' innseadh sgeòil. Air an ath shamhradh fhuair soitheach eile bhuineadh do Shasunn, an soitheach 's an robh e, air acair gu tearuint' ann am beul aibhne 'an *Lapland*, agus gach duine de'n sgiobadh air reodhadh gu bàs!

Anns a' bhliadhna 1576, chaidh *Martin Fobisher* a mach a cheud uair. Ach a' saòilsinn, tha e coltach, gur h-i 'n “treas uair a bhualhaicheas,” chaidh e mach dà uair eile: gidheadh gun soirbh-

eachadh air bith. An déigh an neach so chaidh Iain *Davis* a mach trì uairean mar an ceudna; 's ged nach d' fhuair e mach na bha e 'g iarraidh, gidheadh fhuair e mion eòlais mu chòrsan *Ghreenland*; ni a rinn tuille feum a thaobh iasgach nam mucan-mara na gach fiosrachadh a fhuaradh mu'n chearn ud o sin gu so B'e *Henry Hudson* an ath aon a chaidh a mach. Thug esan ceithir oidhirp-ean; ach air a thilleadh dhachaidh an ceathramh uair, dh' éirich an sgiobadh 'an ceannaire 'na aghaidh—thilg iad ann am bàta fosgailt' e, agus dh' fhàg iad e gu bàsachadh air druim a chuain mhòir! 'Na dheigh so chaidh *Baffin* a mach, agus ged nach d' fhuair e na bha e 'g iarraidh, gidheadh fhuair e eòlas air na còrsan ud, a bha ro fhéumadh dhoibhsan a chaidh a mach uaithe sin.

O 'n àm sin (1616) a nuas gu 1818 — a bhliadhna 's an deach Sir Iain *Ross* a mach air a cheud turas—cha d' fhuaradh dad tuille fiosrachaidh mu na crìochan iomallach ud na bha aca roimhe sin: ged a thug tuille agus fichead maraiche foghainteach oidhirp aig caochladh amannan. Chaidh *Parry* a mach air a cheud taisdeal 's a' bhliadhna 1819; ach uaithe sin chaidh e mach trì uairean; agus faodar a ràdh gur h-esan is fhaide chaidh air aghaidh do na dh' fhéuch e. Sgrìobh agus chuir e mach cunntas eignidh mu gach nì chunnaic e, agus tha mòran fiosrachaidh mu na cearnan cian ud r'a fhaotuin ann. 'Sa' bhliadhna 1829, chaidh Sir Iain *Ross* a mach an dara uair agus sgrìobh esan mar an ceudna cunntas taitneach mu na chunnaic e féin.

Tha na soithichean a tha 'dol air na taisdeil so a' fàgail Bhreatuinn mu thoiseach an t-samhraidh. Tha iad a' leagail an cùrsa ach beag 's ann aon rathad ris na soithichean a tha 'dol do Chana-da; ach a bhàin gu bheil iadsan a' fuireach ris an ear thuath. Tha iad a' cumail *Ghreenland* air an làimh dheis, agus *Esquemaux* mu Dheas air an làimh chli. Tha beanntan mòra de'n eigh, a tha air an giùlan air an ais 's air an aghaidh leis an t-seòl-mhara, 'gan coinneachadh, o 'm bheil iad 'am mòr chunnart a bhi air am bruthadh 's air am pronnadh: gu sònruichte ma tha fèath 'tighin orra. Tha iad a' gabhail seachad air *Labrador*, 's air gach caol 'us eilean a tha air an làimh dheis; gus mu dheireadh, 's e sin ma tha iad a' faotuin air an aghaidh mar is miann leò, a bheil iad a' ruigh-eachd *Esquemaux* mu Thuath.

Cha 'n urrainn neach air bith nach fac' an t-àite so 'chreidsinn co ùdlaidh, chianail 's a tha aogas gach cuspair leis am bheil am fear-turais air a chuartaich. Air fhad agus g'an teid e air aghaidh cha 'n 'eil féur no fochan, cha 'n 'eil lus no blàth, cha 'n 'eil craobh no crann r'a fhaicinn. Cha 'n 'eil guth, no fuaim r'a chluinntinn o bhliadhna gu bliadhna, ach ulfhartaich nam fiadh-bheathaichean 'an tòir air an creich, séidrich na muice-mara, agus a nis 'sa rithis raoiceil na h-eigh 'n uair a tha i 'faoisgneadh o chéile. Tha e air a thoirt fainear leis gach aon a thaoghail 's an àite, an t-astar do-chreidsinn aig an cluinnear an fhuaim a lughha. 'Surrainn dithis seanachas a dheanamh aig astar mìle o chéile gun an guth a thogail ro àrd!

Tha Sir Iain Ross a' toirt a chunntais a leanas air a' cheud choinneamh a bh' aige ri nàisnich an àite.—“Mu dheich uairean a latha chunnaic sinn ochd slaid air an tarruing le madaidh a' gluasad gu h-aitheasach a dh' ionnsuidh an àit' an robh sinn. 'N uair a thainig iad mu thuaiream trì cheud slat dhuinn stad iad. Ghabh sinne 'n an coinneamh; ach an uair a dhlùthaich sinn orra theich iadsan air an ais. Ach na dhéigh so ghabh aon diubh de mhisnich na thainig far an robh sinn agus lean càch e. Bha aon duine 's a chuideachd aguinne aig an robh ni-eigin de thuigse air cànan nan daoine so; agus cha robh e féin agus iadsan fad a' tighin 'an eòlas air a chéile. Chomharaich iad ris an luingeas a bha nan luidhe air acair dlùth dhuinn, agus dh' fheòraich iad ciod a ghnè chréutairean a bh' anna? Am b' ann o'u ghréin no o'n ghealaich a thainig iad? Am b' ann 's an oi'che no 's an latha a bheireadh iad solus? Dh' innis an duine so dhoibh gur h-e bha anna tighean air an deanamh de fhiodh. 'Cha 'n urrainn sin a bhi (deir iadsan), oir chunnaic sinn féin iad a' tighin le 'n sgiath-an sgaoilte.' Dh' fheòraich iad co as a thainig sinn? Fhreagair esan, 's e 'comharrachadh ris an àirde Deas, gu'n tainig sinn as a' chearn ud. 'Cha tainig, cha tainig (deir iadsan) cha 'n eil dad an sin ach sneachd' 'us eigh.'

“Thug sinn an sin cuireadh dhoibh uile tighin leinn air bòrd. Bha iad mar gu'm b' ann fo amhuras mu'r déighinn; ach co dhiubh dh' aontaich iad dol leinn. Chuir gach ni a chunnaic iad air bòrd mòr ioghnadh orra; gu sònruichte na sgàthain. Am measg dhealbh-an a bha crochta 'an seòmar mòr na luinge thug iad fainear coltas an luchd-dùthcha féin; agus 'n uair a bheachdaich iad orra blhuail iad am basan agus ghàir iad gu cridheil. Thairg sinn biadh dhoibh, ach cha bhlaiseadh iad e; ach thug sinn ùileadh dhoibh agus dh'òl iad e le mòr chiocras! Mu'n do dhealaich sinn thug iad cuireadh càirdeil dhuinn dol g'am faicinn d'an tighean féin co luath 's a bhiodh e freagarrach.

“Thog sinn oirnn air an latha gheall sinn, agus 'an déigh ioma dìreadh 'us tearnadh thairis air na beanntan mòra eigh a bha eadar ruinn rainig sinn am baile beag anns an robh na nàisnich a chòmhnuidh. Bha e air a shuidheachadh aig bonn sléibhe; agus bha na tighean (a dhà-dhéug 'an àireamh) air an deanamh de shneachda: car coltach 'n an cuma ri cupan le bhéul fodha. Bha na bothain so an taobh a stigh, mar a dh' fheudar a thuigsinn, gun mhòran loinn no riaghailt. Air meadhon an urlair bha meall sneachda air an robh croicinn fhiadh agus chréutairean eile air an leagail a bha aca air son leaba. Aig dara ceann an àite so bha bean-an-tighe 'na suidhe le lòchran no crùisgein laiste mu 'coinneamh, a bha 'toirt araon solus agus blàthas seachad. Bha na mnathan gu béusach, banail; agus bha iad g'am folach féin mar gu'm biodh gnè de fhiambh orra romhainne; ach 'n uair a thug sinn dhoibh beagan de ghoireasan a bha sinn fiosrach a bhiodh féumail dhoibh, ghabh iad misneach gu tighin 'n ar làthair. Bha gach fir

ionnach 'us boirionnach os cionn ceithir bliadhna' déug de dh' aois pòsda. Bha 'm bicheantas a dhà no trì 'theaghlaichean 's gach bothan. Bha arson na fir 's na mnathan air an còmh-dach le croic-inn fhiadh, ròn, no mhath-ghanhnna; agus bha an deiseachan am bicheantas air an deanamh gu cuimir. Bha 'n éideadh a ghnàth dùbailte; ach gu tric trì fillte, agus aig amannan ceithir fillte. Cha robh dad de dh' atharrachaidh eadar còmh-dach nam firionnach 's nam boirionnach, ach a mhàin gu bheil seòrsa de phabagan fuaighte ri còmh-dach nam boirionnach. Cha robh coltas gainne no sàrachaidh orra; oir bha pailteas de shaill ròn 's de shithinn aca, agus tuille cha robh iad ag iarraidh. Mar so, ged nach 'eil iad a cur sil, no 'buain, no 'cruinneachadh an saibhlìbh; gidheadh a ta an Athair nèamhaidh 'g am beathachadh. Bho chor nan *Esquemauxs*, tha foillseachadh sònruicht aguinn air cumhachd an Tì sin is 'urrainn bòrd a dheasachadh 's an fhàsach, agus air a ghliocas neò-mhearachdach a riun gnè agus iarrais a chinne-daon-na freagarrach do gach cearn 's a bheil iad air an suidheachadh; co dhiubh is ann fo anail reòtaidh, ghuineach na dùthcha so, no fo ghréin loisgich uan Innsean."

Bho cheann ceithir bliadhna gu leth sheòl Sir Iain *Franklin*— maraiche teòma a dh' fheuch aon turas roimhe sin—á Sasunn, leis gach uidheam 'us goireas a bha freagarrach, maille ri urrad lòn 's a dh' fhòghnadh dhoibh ri ceithir bliadhna; agus cha 'n fhiosrach sinn gu'n d' fhuaradh dad d an sgéul uaithe sin. 'Se beachd mharaichean eile gu'm bheil iad air an dùnadh a suas leis an eigh 'an àit eigin. 'Nuair a tha aiteamh a' tighinn mu thoiseach an t-samhraidh, 's a tha 'n eigh a' briseadh o chéile, tha na sotibichean a' faotuinn air an aghaidh nas fhaide; ach mar faigh iad air an ais roimh thoiseach an fhogharaidh, cha bhi ach caol thuiteamas am faigh iad air an ais gus an ath bhliadhna; no theagamh nach faigh iad air an ais gu ceann ùin' a's fhaide; dìreach a réir fuairlead na side. Bha Sir Iain *Ross* air a ghlasadh suas mar so dlùh air bliadhna. Cha robh cùram co mòr nu thearuinteachd Sir Iain *Franklin* gus am bliadhna, do bhrìgh gu'n robh de lòn leò na mhaireadh gu meadhon an t-samhraidh a dh' fhalbh, agus theagamh na b' fhaide; 's e sin ma rinn iad guaim mhaith air, 's gu'n do chuir iad a bheag ris le iasgach s le sealgaireachd. Ach a nis 'n uair a tha'n cuigeadh geamhradh air tighin oirnn o'na dh' fhalbh iad agus nach 'eil dad for'ais air fhaotuinn mu'n déighinn, ged a ghnàthaicheadh gach meadhon a bha comasach, thatar a' toirt dùil diubh gu buileach. Rinn luchd-riaghalaidh na rioghachd na b' urra-ainn iad gu an sgéul fhaotuinn. Chuireadh luingeis a mach air an tòir aig caochladh amannan; agus eadhoin aig an àm so tha iad a' tairgsinn duais mhòr do neach air bith a bheir sgéul fìor mu'n tiomchioll, co dhiubh tha iad beò no marbh. Tha e air a ràdh gu'n do reic céile Sir Iain *Franklin* a séudan chum an duais a mheudachadh; agus cha 'n 'eil teagamh nach 'eil ionadhl céile, màthair, agus piuthar ann am Breatunn a dheanadh an nì céudna

air son a chuid eile de'n sgiobadh na'm biodh e 'n an comas. Tha sinn a' cluinntinn gu'n do chuir na h-Americanaich long air a deadh uidheamhachadh a mach air son an aobhair chéudna. Gu'n soirbhlicheadh Dia leò uile. Leigidh sinn fios d'ar léughadairean o àm gu h-àm mu na chluinneas sinn mu'n chùis so.

S.

VI.

IMRICH DO PHORT NATAL.

BHO àm gu h-àm tha sinn, mar a tha fios aig ar léughadairean, ag oidhirpeachadh gach fiosrachadh a's urrainn duinn a thoirt seachad mu na cèarnan sin de'n t-saoghal a tha freagarach air son luchd-imrich. Tha mòran gluaisid aig a' cheart àm so 's an taobh-deas mu thuineachas ùr a dh'fhosgladh air taobh na h-àird an ear-dheas de dh' *Africa*, mu dheidh céud mìle sear air *Cape of Good Hope*; agus do bhrìgh nach 'eil aguinne bàigh ri àite seach àite bheir sinn seachad cunntas frinneach mu'n dùthaich so, co fada 's a tha e 'n ar comas fhòghlum o sgrìobhannan dhaoine creideasach a shiubhail troi'pe.

'Se *Natal* is ainm do'n chearn so. Tha e mu'n cuairt air deich 'us ochd fichead mìle air fad, agus mu dheidh 'us sea fichead mìle air lèud. Tha 'n grunn ro thorach, agus tha 'n aimsir a ghnàth ro chiùin, shàmhaich. Cha 'n 'eil an samhradh idir co teith 's an àite so 's a tha e ann an cuid eile de dh' *Africa*; ni mo tha 'n geamhradh fuar. Cha 'n 'eil ach gann nì a chinneas á talamh nach 'eil a' fàs ann. Tha gu bicheanta dà bhàrr 'ga thoirt as an talamh gach bliadhna. Anns a' gheamhradh cha ruigear a leas a bhi 'beathachadh na spréidh le biadh-laimhe; oir tha pàilteas feòir aca 'ghnàth r'a fhaotuinn. Tha aimhnichean 'us sruthain ro phailt ann; agus ged nach 'eil uisg' a' tuiteam ann ach aig amannan sònruichte de'n bhliadhna tha pàilteas a ghnàth r'a fhaghuinn. Tha aghaidh na dùthcha an sud 's an so ag éiridh na cnuic ghorm, fhéurach; 's an àitean eile a' tearnadh na glinn uaine, fhasgach. Tha acarsaid ro fhasgach aig Port *Natal*; fìor choltach 'na cuma ri "Crudh' an Eich" an Cearara: ach tha 'chuid eile de 'n chladach an cois ann bheil am fearann a' sìneadh gun mhòran fasgaidh. Feudar a ràdh le firinn gu bheil an dùthaich air "chùl gaoithe 's air aodann gréine." Tha i 'g éiridh 'na leitir fharsuing o'n chuan mhòr Inn-seanach, gus an ruigear gàradh droma mòr de bheanntan mu cheithir mìle troidh air àirde, a tha 'sgaradh na cearn so o'n taobh an iar de dh' *Africa*. An taobh a muigh de na beanntan so, agus ann an cridhe na dùthcha tha na *Hotentots* agus na *Caffirs* a' tuineachadh; ach ged a bha mòran iorghuill eadar a chuid diubh so a tha dlùth do'n *Chape* agus na h-Eòrpaich a tha 'tuineachadh 's an àite sin; gidheadh cha 'n 'eil sinn a' cluinntinn gearan air bith umpa ann an coimhearsnachd *Natal*.

Tha 'n Comunn aig am bheil riaghaladh an àite 's a tha 'cur eilthireach a mach, co fad' 's is fiosrach sinne, nan daoine creideasach. Agus cha 'n uileir dhoibh sin; oir tha uachdranachd Bhreatuinn ag amharc gu géur an déigh Comuinn de'n t-seòrsa so. Air son gach cend eilthireach a chuireas iad a mach tha mìle punnd Sasunnach aca r'a leagail 'an làmhnan riaghalairean na rioghlachd so. Tha 'n t-airgiod so air a ghleidheil gus an tig fios o na h-eilthirich, agus ma rinneadh fealladh orra ann an nì air bith a ghealladh dhoibh tha deich punnd Shasunnach ga thoirt an làimh an urra dhiubh a chum an calldach a dheanamh suas. Cha 'n 'eil an t-àite so ach mu sheòladh naoi seachduinean o Bhreatunn, no leth co fad' air falbh 's a tha *Australia* no *New Zealand*; gidheadh cha cheadaichear do long eilthireach air bith seòladh gun lòn sea no seachd déug de sheachduinean a bhi aic' air bòrd, air eagal ciod an grabadh a dh' fheudadh tachairt air an t-slighe.

Tha 'n Comunn so a' deanamh aon nì a tha ion mholta: 's e sin, bheir iad aiseag saor do mhinistear diadhaidh de aidmheil fhallain air bith ma tha e 'falbh air ceann buidheann d'a luchd-leanmhuin. Gheibh e mar an ceudna ceud acair fhearainn, agus leth-cheud punnd Sasunnach gu cuideachadh tigh-aoraidh a chur suas.

Chuir aidmheil a tha ro lionmhor an Sasunn (ua *Wesleyan Methodists*) a mach buidheann d'an luchd-leanmhuinn, maille ri minist-eirean 's ri maighstirean-sgoile o cheann beagan mhiosan. Tha 'n Comunn so anns gach àit' am bheil iad ro eudmhor, dhealasach a chum aobhar Chrìosd a chur air aghaidh. Tha iad ro dhìchiollach gu fòghlum 'us oilein a thoirt do'n mhuinntir òig. Tha cuid a' gearan gu bheil tuille 's a chòir de nàisnich an àite a' tuineachadh fathasd ann an *Natal*, agus gur h-ann mar is luaithe a ruaigear as iad is fearr e. Na aghaidh so tha na *Methodists* ag ràdh, a réir an beachd-san gur h-ann mar is lionmhoire an sluagh is fearr e; oir ged a tha e na nì ceart gu leòir ann fèin fearann àiteach, spréidh àrach, agus creic 'us ceannach a dheanamh, gidheadh gu bheil e neo-chrìochnach nas féumaile cridheachan agus cinn nan créutairean aineolach so a shoillseachadh le eòlas a dh' àrdaicheas iad mar dhaoine anns an t-saoghail so, agus a chuireas ann an sealbh iad air "oighreachd neo-thruaillidh, neo-shallach agus nach searg as" an taobh thall de'n uagh. Tha na nàisnich am bitheantas nan daoine gun bhruaillein, agus dìchiollach gus gach cosnadh a gheibh iad a ghabhail. Tha iad ro fhreagarach gu saothreachadh am measg a' *chotain*, a chinneas gu pailt 's an aite so. Tha mòran diubh a thainig air theanacas do *Natal*, bho chorruih an rìghrean 's an cinn-chinnidh fhuilteach. Tha e ceart gu'm faigheadh iad so gach tearmunng agus gach dèidin a tha mhàin ra fhaotuinn fo laghannan agus fo riaghaladh Bhreatuinn. Bu chòir do ar Cinneach-ne a chùimhneachadh nach ann idir a chum an crìochan a chur am farsuingeachd, no a chum am maoin a mhèudachadh, ach a chum a bhi 'n an eiseimpleir do chinnich na talmhuinn anns gach gnìomh ion-mholta, a bhuilich Iehòbbah a

leithid de chumhachd agus de dh'èolas orra. Bu chòir gu'm b'è an suaicheantas anns gach cearn d'an rachadh iad, "Sith air thalamh, agus deagh-ghean do dhaoibh."

Tha 'n t-airgiod aisig ro achdarra, a mhàin deich puinnnd Shasunnach air son gach aon a tha os cionn ceithir bliadhn' deug a dh'aois. An lorg so tha pailteas lòn aca r'a fhaotuinn fad an turuis, agus mar an ceudna fichead acair fhearainn 'n uair a ruigeas iad thall. Tha 'm fearann air a thomhas agus air a thoirt do gach teaghlach air an dòigh a leanas.—Iadsan a phàigh an t-airgiod-aisig an toiseach gheibh iad an roinn nas faisge do'n bhaile-mhòr, agus mar sin tha iad, aon an déigh aois, a' gabhail a steach do'n dùthaich, agus esan a bha air deireadh ann am pàigheadh an airgid aisig 's e is faid' air falbh o'n bhaile-mhòr. Is e cuig puinnnd Shasunnach an t-airgiod-aisig a tha r'a phàigheadh air son cloinne, o aois aon bhliadhna gu ceithir bliadhn' déug. Tha pailteas lòn aca-san r'a fhaotuinn mar an céudna, a thuille air cuig acraichean fearainn an t-aon. 'N uair a ruigeas na h-eilthirich, tha luchd-gnothaich a' Chomuinn a' deanamh ullamh gus gach nì tha feumail a dheanamh air an son. Tha àitean tàimh freagarrach air an ullachadh dhoibh far am feud iad a' cheud mhios a chur seachad gun mhàl no cis.

Tha tuarasdail ro àrd aig luchd-ceaird ann an *Natal*. Thainig cunntas o cheann ghoirid mu dheich 's tri fichead eilthireach a chaidh a mach 's an t-samhradh a chaidh; agus tha e air a ràdh gu'n robh saoir-gheala a' faotuinn o sheachd gu deich tasdain 's an latha; saoir-bhàtan deich tasdain; saoir-mhuillea o chd tasdain; treabhaichean deich puinnnd fhichead Shasunnach 's a' bhliadhna; boirionnaich no searbhtan tighe cuig puinnnd fhichead Shasunnach.

Tha 'n Comunn so 'cur air falbh soitheach gach mìos. Air an deicheamh là fichead de'n mhios a chaidh seachad dh'fhàg bàrc eireachdail d'an ainm an "*Ina*" Cluaith, le ochd déug 'us cuig fichead eilthireach air bòrd. Na'n giùlaineadh an soitheach tuille tha e air a ràdh gu'm b' fhuasd' am faotuinn. A chum gach cothrom a thoirt dhoibhsan le 'miann dol do'n chearn ud tha soitheach eile ri seòladh á Cluaith 'an ùine ghoirid. Neach air bith le m' miann fiosrachadh is mine fhaotuinn mu *Natal* na thug sinne seachad, gheibh iad e o Fhear-gnothaich a' Chomuinn, *Dr Robert Beveridge*, 8 *P.ince's Square*, *Glasgow*.

VII.

GNATH-FHOCAL.

Dean do ghearan ri fear gun iochd 'us their e "Tha thu bochd."
Dh' aithnich mi gur meann a bheireadh a' ghabhar.
Dà thrian bùidheann baranda.

Dheanadh tu teaghair de ròineig.

Dean do gharadh far an d' rinn thu t-fhuarach.

"Dheanadh sin e," mar a thuirt an cù mu'n uachdar.

Diù na comhairle 'toirt far nach gabhar i.

"Dheanadh e rud-eigin do dh'aon ach 's beag a' chuid dithis e," mar a thuirt Alasdair Mòr mu'n t-saoghal.

Dean cnuasachd 's an t-samhradh a nì 's a' gheamhradh do gharadh.

Dean maith 'an aghaidh an uile.

Dheanadh tu caounag ri d' dhà lurgain.

Druididh gach eun ri 'ealtainn.

Deoch mhòr do Bhrian 's b' e sin a mhiann.

Deireadh an latha 's maith na h-eòlaich.

E

Eisd ri gaoith nam beann gus an traoigh na h-uisgeachan.

Earbs' á claidheamh briste.

Eadar a làmh 's a thaobh .

Eadar am bogha 's an t-sreang.

Eug 'us imrich a chlaoidheas tigheada.

Eadar leòir 'us eatorras.

Eadar an long nodha 's an seann rudha.

Ealaidh gun rath.

Earrach fad' air chùl Càisg.

F

Far nach ionmhuinn duine 's ann is 'usa éigneachadh.

Fear urrad rium ag iarraidh fuigheall orm.

Faochadh gille 'ghobhain, o na h-ùird gus na builg.

Fear an ioma mhòir 's e is binne glòir.

Faodaidh duine 'chuidithe gun a chluasan a shalachao.

Fhuair e car troimh 'n deathaich.

Fad o'n t-sùil, fad o'n chridhe.

Feuch an laogh blàr buidhe dhomh 's na feuch a chuid domh,

Fannan de ghaoth an ear leannan an t-sealgair.

Fear na foille 'n ìochdar.

Fhuair thu fios an eagail.

(Far am bi geòidh bidh iseanan.

Fear na bò féin 's a' pholl an toiseach.

Far an luidh neach 's ann a dh' éireas e.

Far nach bi na coin cha leigear iad.

Faodaidh an cat amharc air an rìgh.

Faodaidh an cat amharc air an rìgh.

Far nach bi na mic-uchd, cha bhì na fir-fheachd.

Feumaidh fear nan cuaran éiridh uair roimh fhear nam bròg.

Fuilingidh gach créutair a bhì gu maith ach mac an duine.

Fial'achd do n fhògarach, 's cnàmhan briste do'n éucorach.

Fanaidh duine sona ri sìth, ach bheir duine dona dui-leum.

VIII.

NAIGHEACHDAN.

EOGHAN SAIGHDEAR AGUS AM MAIGHSTIR-SGOIL'.

Eoghan. Fàilt' oirbh. Thainig mise g'ar ceasnachadh mar is àbhaist. Feuch am bi sibh co maith agus tachdain eile thor t air mo shoilleireachadh anns na gnothaichean mòra 'tha dol air an aghaidh 's gach cèarna. Tha na h-oidhcheachan a nis ro fhada, agus is oircheas dhuibh ni-eigin innseadh dhomh a ghleidheas sean-achas rium féin 's ris a' chaillich 'n uair a bhios sinn an sud 'n ar dà dhòraman taobh na grìosaich.

Maighstir-Sgoil. Ciod 'so a's mò 'tha 'cur a chùram ort an tràs' Eoghain? C' àit an tòisich sinn an diugh?

E. Cha tig dhomhsa bhi moiteil 'n uair a tha mi ris a' bhleid, agus tha mi car coingeis ciod a' chearn aig an tòisich sibh. Bheir sibh sgéul soilleir, brìghmhor mu àit air bith air an dean sibh iomradh. Ach nam b'e ur toil e bu ghlé mhaith leam a chluinntinn cia mar 'tha dol do'n Phàpà. An do thill e ris an t-seann làraich fhathasd?

M. Cha do thill fhad 's is fhios dhomh; ach bha sàr-fhiuthair aige féin 's aig a chàirdean gu'n tilleadh e do'n Ròimh mu'n bhliadhn' ùir; agus cha'n 'eil e éucoltach gu'm feud e bhi air sin a dheanamh ged nach cuala mis' e fathasd.

E. Nach iongantach an obair, 's an iomairt a tha orra. C'arson nach falbh e, no nach fuirich e? Cha 'n 'eil fhios agam fhéin dé an fire-faire 'tha orra. Dh'fheudadh e dol a cheann eile an t-saoghail 's a bhi air ais o'n a thòisich e air bruidhinn mu'n tilleadh sin do'n Ròimh.

M. Tha iomad snuim r'a fuasgladh, 's iomad té r'a ceangal—iomad gnothach ciogailteach r'a shocrachadh eadar e féin 's na Frangaich m'am bheil féum dha tilleadh.

E. Theagamh gu'm bheil. Ach innsibh so dhomh. Am bheil na Frangaich air atharrachadh a thoirt air laghannan 's air reachdan an dùthcha, no'm bheil a h-uile gnothach ri bhi air an t-seann rian—fo làn ùghdarras a' Phàpà féin?

M. 'S e 'n latha a dhearbhas. Tha iomradh air gu'm bheil cùisean ri bhi nas fearr—gu bheil tuille cumhachd r'a thoirt do'n t-sluagh ann an nithean aimsireil; ach cha 'n 'eil féum a' bheag a ràdh gus am faic sinn. Agus mu nithean spioradail cha 'n urrainn na Frangaich no daoine eile 'n cur ceart gus an tig an sluagh féin gu tuisge, 's gu soillse. Cha 'n 'eil teagamh air bith nach bi beagan tuille saorsa aig an t-sluagh na bha aca. Ach cha 'n fhaic mi gur h-ann le toil a' Phàpà; agus cha 'n 'eil a' bheag de thoradh maith air bith r'a fhaicinn fathasd o thuras nam Frangach, d'am bu chòir gu cinnteach 'ealladh ghabhail ri muinntir na Ròimhe mar a rinn daoine eile riutha féin.

E. Leigeamaid dhoibh an tràs matà; agus féuch an innis sibh dhomh cia mar a tha cùisean a' dol ann an *Hungary*?

M. Tha mar nach olc do na daoine cumanta, agus dhoibhsan a strìochd 'na thràth; ach gu bochd, bròuach dhoibhsan a sheas a mach tuille is fada; agus dhoibhsan a tha uaibhreach, cumhachdach, no cliùiteach. Rinn muinntir *Austria* gu ro chruaidh-chridh-each ri mòran diubh so. Chuir iad mòran de na daoine a' b'ainm-eile 's an dùthaich gu bàs tàmailteach, cràiteach, 'g an crochadh mar mhortairean. Chuir iad mòran eile 'am prìosan as nach 'eil gealladh aca faghuinn ré am beatha, agus chuir iad ùmhladh co trom air feadhain eile 's nach 'eil aca na ghleidheas am biadh riutha féin, no r'an teaghlach. Thug e gaoir feadh na Roinn-Eòrpa gu léir mar a rinn iad; 's cha 'n 'eil teagamh air bith nach fadaidh e fuath, 'us gamhlas 'an cridheachan nan *Hungarianach* o'n tig toradh searbh là-eigin fhathasd.

E. Tha sin uile glé chruaidh gu dearbh; ach nach iad na *Hungarianach* fhéin a thòisich air an iorghuill? agus 'n uair a chaidh a' chùis 'n an aghaidh cha 'n fhaic mi nach ion dhoibh dìreach cur a suas leis a' chuibhriun a gheibh iad. Cha 'n 'eil mi air son ar-a-mach agus cogadh a bhì air a thogail ann an dùthaich, 's cha doichìoll mi deadh fhàsghadh dhoibhsan a tha 'bualadh a' chéud bhuille.

M. 'S iad féin gun teagamh a thòisich air an stréupaid; 's cha 'n 'eil mis' ag radh gu'n robh iad ceart ann an tòiseachduinn. Dh'fhéumadh e tuille eòlais na tha agamsa air eachdraidh na dà dhùthcha, 's air gach connsachadh sean 'us ùr a bha eatorra gu breith shoilleir a thoirt air a' chùis. Ach abair gu'n robh iad 'am mearachd. Bha e neo-fhiachail—bha e cruaidh-chridheach, agus gràineil do mhuinntir *Austria*, 'n uair a fhuair iad a' chuid a b'fhearr dol a pheanasachadh, sa phianadh air dhòigh co fuilt-each 's a tha iad a' deanamh. Bha e ro ghràineil dol a chrochadh dhaoine fiachail, foghainteach, urramach nach d'rinn cron ach airm a thogail 'an aobhair an dùthcha féin—dol a sgiùrsadh *mhathan-uaisle* air son gu'n d'riun iad còmhnaidh ri'm fir, 's ri'm mic féin; agus cha 'n 'eil teagamh agam nach tionndaidh a' chùis a mach co amaideach 's a tha i cruaidh-chridheach. Cha 'n e sud an dòigh air sluagh lìomhor, beachdail, gaisgeil a thàladh ri smachd *Austria*. Nach fad air atharrach a rinn muinntir Bhreat-uinn ris na h-Eirionnaich an uraidh?

E. Stadaibh! stadaibh! ma 's e ur toil e. Cha 'n abair mi smid 'n am fàbhar ma bha iad a' sgiùrsadh nam mnathan-uaisle, no boirionnaich air bith. Bha sin mosach, nàrach. Coma leam tuille an fheadhain aig an robh làmh air bith 's a ghnòthach sin. Nach bu nàdurra, 's nach bu dleasnach do na crèutairean gach cuideachadh a b'urrainn dhoibh a dheanamh le'm fuil 's le'm feòil féin. Ubh! ubh! na'n deantadh peanas idir orra 's ann air son iad a dheanadh air atharrach a bu chòir coire fhaghuinn dhoibh. Fàgamaid iad; agus cia mar a tha gnothaichean an cèarnan eile de'n t-saoghal?

M. Tha sgéul agam dhuit nach 'eil ro thaitneach air àit' a bhuineas do Bhreatunn aguinn fhéin, far am bheil mòran iomairt 'us aimbreit aig a' cheart àm.

E. Fhéudail! fhéudail! An tig clos air an t-saoghal idir? C'ait a bheil so? An iad na daoine fiadhaich ud 's an àird an Ear, leis an ainm bheag, shleamhain air nach urrainn mi greim a ghleidheil a rinn na h-urrad chòmhraig o cheann bliadhna no dhà a th' air tarruing a mach a rithis?

M. Na *Sikhs*. Cha 'n iad. Tha iad sin air an cìosnachadh gu maith aig an àm; ach 's iad muinntir a' *Chip*, mar is minic a chuala mi na Gàidheil ag ràdh ris—an *Cape of Good Hope* ann an *Africa*.

E. A ghràidh nam fear! Nach ann agam a tha 'n deadh chuimhn' air—nach robh mi m'a ghlacadh o na Dùitsich, an uair a bha *Baird* us *Beresford* air ar ceann. Na ceòsanaich leathann, chlàrach na Dùitsich 's ann orm—

M. Stad, stad Eoghain: cha 'n 'eil mis' ag iarraidh an t-seann sgeòil mu ghlacadh a' *Chip*. Cuimhnich gur h-ann a tha thusa a' farraid dé a tha 'dol air aghaidh ann an tràs—agus so e; gu sgéul goirid a dheanamh air. Tha fhios agad gu'm bheil na droch dhaoine sin a tha ciontach 'an goid, 's an spùineadh, 's an ioma cron de'n t-seòrsa sin air an cur as an rioghachd, 's air an gleidheil mar phrìosanaich, agus aig obair 'us saothair an cèarnaibh céin a bhuineas do Bhreatunn: agus so, an dà chuid gu'm peanasachadh agus gu'n ath-leasachadh, ma ghabhas e deanamh.

E. Tha fios agam gu'm bheil na béisdean sin air an cur do *Bhotani Bay*; agus gu dearbh their mi nach b' oil leam ged a bhiodh beagan tuille air an cur ann. Tha h-aon no dhà a's aithne dhomh mu'n abrainn, na'm b' fheairrd iadsan ac' iad nach bu mhisde sinne uainn iad. Ach nach 'eil *Botani* fad' o'n *Cheap*?

M. Tha fada gu leòir gus an fhear a's faide làmh a ghleidheil o ruigheachd air. Ach tha muinntir *Australia* agus luchd-comhairle na Bàn-rìghinn mar an ceudna a' smaoineachadh gu bheil tuille 's a' chòir de na ciontaich ud ('*convicts*') ann am *Botany Bay*, 's anns na cearnachan mu'n cuairt; agus dh' aontaich iad buidheann dhiubh a chur do'n *Cheap*. Rainig làn soithich dhiubh ach cha b'e 'n fhàilte chridheil a fhuair iad. Ghabh muinntir *Chape-Town* boilidh 'us bàinidh. Chaidh iad ann an co-bhoinn r'a chéile nach leigeadh iad cas air tìr dhiubh sud am feasd: a thuille air a sin nach leigeadh iad aona ghearradh bidh a chòir an t-soithich air an robh iad; 's nach deanadh iad reic, no ceannach ri duin' air bith a bha air son nan ciontach a shocrachadh anns an dùthaich. Cha reiceadh iad biadh no nì eile ri Uachdaran na dùthcha e féin—*Sir Harry Smith*—no ri aon a bhuineadh dha, gus an òrduicheadh e an soitheach air falbh o'n còrsachan gu léir; agus tha gnothaichean anns an staid so fathasd fhad agus is fhios domh.

E. Ach ghabh iad an deadh dhòigh co dhiùbh air muinntir an

t-soithich agus an t-Uachdaran a thoirt thuige. Gleidheadh iad am biadh uatha 's cha 'n 'eil eagal nach teid an latha leò. Cha 'n aithne dhomh fear-ciosnaichidh a's fearr na'n t-acras.—Ach nach fuathasach leibhse gu'm biodh urrad othail, 'us iorghuill, 'us chosdais air a dheanadh le'r rioghachd mu ghràisg mhèirleach 'us bhana-mhèirleach mar sud. Na sruthairean bradach: cha chosdainn-sa mòran, 'n uair a dh'fhòghnadh dhoibh taod cainbe, an rud a choisinn iad. Na ragairean; nam biodh iad aon latha aig an t-seana *Chommandair* aguinne chuireadh deannag luaidhe 's fhudair seachad gach othail 'us dragh mu'n déigh.

M. Mo nàire Eoghain! Is ana-cneasda, agus ro ana-criosduidh a' chainnt sin. Bu ro chruidh an gnothach gach crèutair truagh, seacharanach a tha 'briseadh reachd Dhé, agus dhaoine a ghrad iomain gu sìorruitheachd 's an dòigh sin. Tha Dia fad fhulangach ruinne, 's bu chòir dhuinne bhi mar sin r'a chéile. Agus is nì ro chluìteach do'r rioghachd gu'm bheil i a' deanamh urrad air son chiontach mar sud a thoirt gu h-aithreachas, 'us gu gnàthachadh maith. Tha do bheachd-sa gun teagamh ro fhuilteach, borb.

E. Tha mòran de'n fhìrinn agaibh air chinnt. Ach 'na dhéigh sin uile tha 'mhèirle ro shearbh, agus duilich cur suas leatha. Agus tha mise 'g innseadh dhuibh gu bheil a' chùis a' dol thar na cailce buileach anns a' chearna so fhéin. Cha 'n 'eil mi 'g ràdh dìog mu mhuinntir nan caorach, 's nan gabhalaichean. Biodh iad a' cur gleidheadh, no tòrachd air na tréudan mar a thogras iad. Ach nach glé shearbh do dhuine bochd mar a tha mise, an déigh dha a bhi aig dragh 'us saothair a' cur crioman gàraidh an òrdugh nach fhàgar *Tuirneip* no *Curran* aige gun ghoid. Cha 'n e sin uile; ma dh'fhàgas mi ball àsuin a mach 's an oidhche cha ruig mi leas sealtuinn air a shon 's a' mhaduinn: agus nach do ghoid iad bhàrr an spàrdain 'an ceann shìos an tighe agam a' chearc a bha 'breith an uibhe dhomh. Agus gnothach a's gràineile na sin uile—rud nach cualas 'am measg dhaoine cneasda riamh—nach do ghoid iad iarruinn na *seisirich* air an duine chòir so shuas aig a' Chaol! Tha mise 'g ràdh ruibh gu'm féumar na mèirlich a chur 'an *Ceap* air chor-cigin, agus feuchainn riutha nas cruaidhe na thàtar a' deanamh. Ach cia mar a chrìochnaicheas an iorghuill a bha sibh ag ràdh?

M. 'S usa sin fharraid n'a fhreagairt; ach tha e coltach gu leòir gu'n cuir luchd-sdiùraidh na rioghachd do chearn air chor-eigin eile iad.

E. Tha mi 'n dòchas gu'n gléidh iad astar-latha uainn' iad cò dbiùbh. Ach a nis, dé tha 'dol air aghaidh 's an rioghachd ag-uinn féin?

M. Is ioma sin. Ach tha aon nì a's ion a ghleidheil air chuimhne le bròn 's le irisleadh; 's e sin gu'n do ehaochail *Ban-rìghinn Adelaide*—Bantrach Rìgh Uilleam IV.—boirionnach a bha 'na b' urramaiche air son a cràbhaidh, 's a maitheis, na bha i air son a

h-àrd inbhe—boirionnach air leth air son seirc', iochd agus iris-leachd. Fhuaradh aon nì a mach mu déighinn o'n a chaochail i a tha 'dearbhadh a h-irisleachd; 's e sin iarrtas a dh'fhàg i sgriobhta 'na déigh a thaobh an dòigh anns am bu mhiann leatha 'bhi air a h-adhlacadh. "*Tha mi 'faghail a' bhàis (deir ise) anns an uile irisleachd, làn fhiosrach gu bheil sinn uile comh-ionnan ann an sealladh Dhé; agus air an aobhar sin tha mi 'g iarraidh gu'm bi mo chorp air a ghiùlan chum na h-uaigne gun othail, gun mhòr-chuis, agus gu'm bi an tiolacadh air a dheanamh ri solus latha. Tha mi 'g dùthnèadh nach bi mo chorp air fhosgladh, no spìosraidh air a chur air; agus gu'm bi gach nì air a dheanamh co saor o dhìomhanais an t-saoghail, agus le co beag dragh 's is comasach.*" Thug Bàn-rìghinn Victoria fainear an t-Iarrtas so 'dheanmh co follaiseach 's a b'urrainnear; nì 'tha nochdadh a tuigse 's a h-irisleachd-se mar an ceudna.

E. Tha ise a dh'fhalbh 'na chall do'n bheò, gun teagamh; ach 's cinnteach mi gu'm bheil e 'na bhuannachd dh'i féin. Cha b'ann a mhuinntir na dùthcha so i—am b'ann?

M. B'ann a mhuinntir na Gearmailt i—nighin aoin de na *Diùcan* a tha lion-mhor an sin. *Saxe Meiningen* a tha air oighreachd a tighe. Ach féumaidh mi stad Eòghain. Tha mòran ùine o na thòisich sinn air a chòmhradh so, agus tha gnothaichean eile agam ri sealtuinn as an déigh.

E. 'S cinnteach gu bheil; agus 's mòr mo chomain duibh air son urrad d'ur seanachas a thoirt dòmhsa. Ach aon fhocal, ma 's e ur toil e. Cia mar a tha ceird 'us cosnadh feadh na rìoghachd?

M. Tha iad 'an eatorras: chunnacas na b'fhearr iad, ach is minic a bha iad mòran na bu mheasa. Tha *farraid* mhaith air cosnadh 's an taobh-deas; agus tha 'mhin a' sìor thuiteam 'am prìs. Tha min mhaith choirce r'a faghuiun 'an Glascho air son aon tasdan déug am bola.

E. Tha coltach nach b'fhearr 'an nasgaidh i! Cruaidh 's mar a tha 'n saoghal gleidhidh a' pheighinn a tha agamsa 's an latha o m' dheadh bhana-mhaighsir a' Bhàn-rìghinn am bonnach rium fhéin 's ris an t-seana-mhnaoi co dhiubh. Slàn leibh—slàn leibh, agus anabarr taing.

N. B. All communications in future to be addressd to **PATON & RITCHIE, 3, Hanover street, Edinburgh.** Those Subscribers in arrears are requested to remit to the Publishers without delay.

Published by PATON & RITCHIE, 3 Hanover Street, Edinburgh.

AGENTS:—Thomas Murray, Argyle Street, Glasgow. Charles Paton, Perth. Lewis Smith, Aberdeen. James Smith, Inverness. J. Allen, Elgin. D. Cameron, Aberfeldy. D. Mackenzie, Nairn.

Printed by **WILLIAM GILCHRIST, 145 Argyle Street, Glasgow.**



